



南齊文紀序



余不佞承乏守宣知宣有禹
金梅先生者以文學顯於明
爲求其後若遺書焉先生之
孫豐中弼中超中立宗皆好

學嗜古能世其家業則以先
生所著鹿裘石室集及輯古
樂苑書記洞詮八代詩乘文
紀諸書謁予爲贊間唯文紀
最鉅上自羲軒以訖陳隋旁

及二氏列卷三百有奇徃宣
厄於兵刻多燬而佚予因捐
俸梓其殘闕役將竣而豐等
復以南齊序請予言爲弁予
蓋讀其書而知先生之大有

功於學者也稽古之道追往
者表其跡論世者證其變至
攻文而據其辭末矣蕭齊襲
霸江左於統爲閏然魏晉而
下天下無共主其德均矣于

齊乎何咎且其君節儉如高
明斷若武諸王若嶷之孝友
良之清尚臣則徐孝嗣之端
簡虞悛之直諫王儉經緯典
禮敷滄甄別流品以及褚淵

序
南齊
王融等皆有可觀其行事著
在史冊矣復爲之紀其文以
不泯其懿是表跡之道也文
者心之聲聲音之道與政通
吳季子觀樂於魯其策六代

十五國之興亡得失若質左
券唯文亦樂之類也漢以上
質而雅魏晉漸綺齊梁以還
益靡靡不足觀矣况歷皆不
延此無它工之制器朴屬歷

久雕刻易敝其理易知也然
亦風會使然即作者亦不自
知讀者冥心諦審之是徵變
之學也若夫攻文之道取法
貴精而徵材必廣洽聞之士

記醜而博啜其醜而咀其英
是在善擇之耳六朝之陋昌
黎氏爲大滌之是已然一切
廢而不觀可乎所謂攻文而
摭辭者必有取焉耳此三者

皆學者所必有事是書之不
可廢也必矣吾故謂先生之
大有功於學者也然予攷南
齊一代守宣者有蕭勵楊運
長諸人而至今唯謝朓名最

顯其治行亦不少概見所傳
唯北樓敬亭遺詠古有之曰
文章爲不朽之盛事信然今
予蒞郡日淺雖無大德于民
然荒階少諍之風實心慕之

百世後有因是書而知先生
以及予者庶幾追往表跡云
若欲發先生所未刻而盡梓
之則又在後之好名者矣予
先爲之竊與梅氏有厚望焉

順治戊戌秋八月望日

江南寧國府知府今陞兩浙

鹽法道遲日豫書



南齊文紀目錄

卷第一

高帝

與中書令褚淵衛將軍袁粲書

褚淵袁粲荅高帝書

與王廣之書

與虞玩之書

與劉俊書

與王延之書

與崔祖思書

又

與世祖書

築壘教

數沈攸之罪惡檄

上順帝誅黃回表

順帝詔

受禪即位告天文

即位大赦文

降封宋公侯詔

原赦詔

省置屯稅詔

減降宋氏第秩詔

斷眾募詔

營卹遺櫬詔

曲赦交趾詔

錄叙從軍官詔

建學詔

蠲戰亡租稅詔

詔朝臣

詔豫章王嶷

與司徒褚淵手詔

褚淵荅

宥王遜詔

詔領軍將軍李安民

呂安國安集司州民戶詔

詔周盤龍

贈劉善民詔

手詔張融

詔夏侯恭叔

徵明僧紹詔

封荷知加羅國王詔

詔荅河南王吐谷渾拾寅

楊廣香為沙州刺史詔

臨終詔司徒褚淵左僕射王儉

勅柳世隆

又四條

勅垣崇祖

又勅

手勅劉懷慰

又勅

勅周山圖

又勅

勅周盤龍

手勅

手勅張岱

勅江謐掌吏部

勅崔文仲

手勅王珍國

報武陵王暉

荅陳顯達 又

荅劉善明

又

荅蕭景先

勅荅柳引

荅晉壽太守楊公則

武帝

與虞綜手書

與玄元度書

高帝喪禮詔

原蕩諸城詔

賑卹京師兩岸詔

又詔

災異蠲卹詔

戍將恩慶詔

優獎郡縣丞尉詔

邦宰滿限詔

恩赦詔

袁粲等葬事詔

小會青溪宮詔

京師二縣沾賚詔

興學詔

又詔

永明三年蠲田租詔

籍田詔 又詔

講武班賜詔

春正普賜詔

霖雨賑賜詔

優貸丹陽屬縣詔

九日詔

蠲三調詔

原北兗八州租調詔
原雍州逋租詔

又詔
增俸詔

奉聖詔
婚禮詔

婚葬崇儉詔
永明八年七月大赦詔

令謫役還本詔
賑賜京師詔

水旱斷酒詔
沾卹二岸詔

又詔
寬黃籍謫役詔

葬宋建平王景素詔

委皇太子長懋決獄詔

荅豫章王嶷邑戶詔

荅豫章王嶷求解大傅詔

豫章王嶷喪事詔
豫章王嶷贈錫詔

褚淵喪事詔
贈褚淵太宰詔

贈王儉太尉詔
贈柳世隆司空詔

誅垣崇祖詔
誅張敬兒詔

贈李安民詔
答薛淵解職詔

贈高平太守戴僧靜詔

驍騎將軍桓康喪事詔

沈冲喪還詔
追贈沈冲詔

蕭景先節度司州諸軍詔

贈蕭景先喪詔

贈蕭景先侍中詔

誅王奐赦詔

長沙王妃詔

贈蕭叡明詔

封茹法亮詔

封范當根純林邑王詔

河南王吐骨渾易侯度進號詔

拜武都王楊集始詔

封宕昌王梁彌頡詔

詔報宕昌王梁彌承

詔報芮芮國

遺詔

又詔

勅廬陵王子卿

又

勅晉安王子懋

又二

勅隨郡王子隆

勅王晏

又二

勅劉祥

勅曹虎

勅豫章內史虞棕

勅中書舍人茹法亮

南郡王昭業贊冠辭

醮酒辭

鬱林王

即位蠲減征調詔

放遣北掠餘口詔

序用勞人詔

量處貪吏詔

隆昌元年下州郡詔

追崇竟陵王子良詔

徵吳苞詔

海陵王

即位詔

新安國吏詔

詮用淮關征戍詔

延興元年冬十月癸巳詔

卷第二

明帝

建武元年即位詔

符斷稅役詔

斷任土恒貢詔

建武元年

銓叙耆齒詔

申枉舉直詔

嚴課農桑詔

罷東田諸役詔

修晉帝諸陵詔

學敷詔

孔聖祀典詔

誅王敬則詔

遣陳顯達北討詔

答奏陳顯達詔

誅王晏詔

誅蕭湛書

江墩讓賻詔

手詔王思遠

賜謝朓詔

贈仇池公楊元秀詔

氏王楊馥之為仇池公詔

遺詔

勅傅昭

東昏侯

誅徐孝嗣沈文季詔

和帝

舉義覃惠教

普除東征衆軍詔

宣德王太后

隆昌元年七月令

延興元年十月令

廢東昏侯令

封南康王爲宣城王令

文惠太子長懋

疾篤上世祖表

豫章王嶷

手啓武帝

武帝答

上論州郡秩俸表

又啓

武帝答

又啓

武帝又答

又啓

武帝答

又啓

武帝答

臨終啓武帝

與沙州刺史楊廣香書

竟陵王子良

陳高言臺使

上高帝懇田表

上讜言表

上武帝論會土塘

啓役

密啓武帝

又啓武帝

諫射雉啟

上武帝請贈豫章王嶷啟

論玉輅啟

與安陸侯緬書

與荊州隱士劉虬書

劉虬答竟陵王書

與南郡太守劉景蕤書

答張融書

答顧憲之書

眼銘

耳銘

口銘

行宅詩序

登山望雷居士精舍同沈右衛過劉先生墓

下詩序

賓僚七要

巴東王子響

啟武帝

同前

有司奏魚復侯子響還本

附

隨郡王子隆

山居序

始安王遙光

啟誅謝朓

東昏侯詔

尚書符討始安王遙光

附

安陸侯緬

與王儉書

蕭景先

遺言

蕭穎胄

移檄京邑

上和帝遺表

卷第三

封建齊國禪代詔策文

策相國齊公九錫文

禪齊詔

策命齊王

再命璽書

兼太史令將作匠陳文建奏符命

褚淵

上高帝臧榮緒晉史啓

高帝答

上武帝遜位啓

謝賜玉佩啓

王儉

諫高帝起宣陽門表

上高帝固請解選表

上武帝求解選表

讓左僕射表

拜儀同三司章

朝服議

褚淵錄尚書事議

司空掾屬禮敬議

司空府史應服議

郊殷禮議

有司又奏明堂

二郊明堂間歲祀議

遷郊議

郊祀明堂異日議

祠部郎中蔡履議

太學博士王祐議

兼博士劉蔓議

兼太常丞蔡仲熊議

太尉從事中郎顧憲之議

尚書陸澄議

尚書令王儉議

諒闇議奏

日蝕齋內社祠議

祭先聖先師議

南郡王昭業冠儀議

朝堂諱訓議

高帝昭皇后遷祔議

有司又奏

王儉又議

穆妃喪禮議

皇太子妃薨前宮臣服議

太子穆妃卒哭後祭議

太子穆妃服閏月議

尚書令褚淵難

又答褚淵難

祠部郎中王珪之議

答王珪之問太子穆妃服議

又議

修史議

議江敷出繼啓

尚書參議

議分南豫啓

與豫章王嶷牋

高帝哀策文

皇太子妃哀策文

褚淵碑文

竟陵王山居贊

暢連珠

卷第四

王僧虔

上宋順帝論舞并三調歌表

順帝詔報

上宋順帝論樂表

上齊高帝言郡縣獄表

答高帝論書啓

上古來能書人名啓

啓二首

答竟陵王子良書

竟陵王子良報王僧虔書

誠子書

與兄子儉書

與張緒書

王琰乞郡牒

題尚書省壁

王慈

上論朝堂諱榜表

博士李攜議

太常丞王偁之議

儀曹郎任昉議

王奐

上高帝辭南蠻校尉表

王融

上武帝啓求自試

上武帝論給虜書疏

武帝答

上武帝陳北伐疏

又上疏

拜祕書丞謝表

爲王儉讓國子祭酒表

又表

又表

謝敕賜御裘等啓

謝敕賜米啓

謝竟陵王示扇啓

謝竟陵王賜納裘啓

謝司徒賜紫鮮啓

謝武陵王賜弓啓

謝安陸王賜銀鉢啓

三月三日曲水詩序

皇太子哀策文

永嘉長公主墓誌銘

豫章文獻王墓誌銘

永明九年策秀才文五首

永明十一年策秀才文五首

王秀之

與朝士書

貽宗測書

王浚之

大輅議

奏彈中丞袁彖

武帝詔

王顥

上齊職儀啓

王晏

文惠太子喪服議

又奏

又奏

又奏

啓武帝

王晏

徐孝嗣

何胤

故太子祔廟奏

王思遠

上明帝固讓吏部郎表

卷第五

柳世隆

與劉懷慰書

論上斷條格奏

劉善明

上高帝陳事表

遺崔祖思書

崔祖思

上太祖陳政事啟

八條

虞玩之

上宋後廢帝陳時事表

上高帝言黃籍表

告退表

劉休

與親知書

上高帝辭御史中丞啓

高帝答

孔顥

上高帝鑄錢均貨議

胡諧之

上高帝解職表

陸澄

宋皇太子朝賀服議

上齊高帝自理表

尚書令褚淵奏

高帝答

與王儉書

王儉答書

顧測

與太守蕭緬牋

何昌寓

與驃騎大將軍蕭道成啓

與司空褚淵書

褚淵答書

劉璣

上高帝訟宋建平王寃書

顧歡

上高帝治綱表

劉思效

上高帝陳讜言表

高帝答

裴叔業

上高帝言梁益疏

卷第六

呂安國

啓置東平郡

沈冲

江謐罪奏

沈淵

薦沈麟士表

沈憲

分置二豫啓
啓

殷瀾

牒請二豫分置

庾杲之

致劉隱士蚪書

臨終上武帝表

宗測

答府召

又答

答魚復侯子響

沈麟士

答張永

與中書郎沈約書

卞彬

蚤蟲賦序

禽獸決

下伯玉

祭孫叔敖文

熊襄

齊典序

袁彖

駁國史議

荀將之胡之爭死議

奏彈謝超宗

劉祥

連珠十五首

任遐奏彈劉祥

對獄辭

劉悛

啓武帝

劉瓛

與張融王思遠書

周顥

與聞喜公子良

與杜京產書

張融

與從叔永書

與王僧虔書

與從弟瓌書

與豫章王嶷牋

海賦序

自序 又

遺令

又

張充

與尚書令王儉書

同前

荀平

遺王秀之書

同前

與王儉書

王植

上武帝撰定律章表

孔稚珪

上武帝論刑律表

上明帝請和虜表

薦杜京產表

為王敬則讓司空表

讓詹事表

奏彈王融

王融對辭

奏彈王奐

謝賜生荔支啓

褚先生伯玉碑

北山移文

祭外兄張長史文

孔琇之

薦王文殊表

丘雄

上武帝乞贈父書

綦母珍之

自請封牒

虞棕

上明帝解職表

虞炎

鮑明遠集序

卷第七

謝朓

辭隨王子隆牋

為王敬則謝會稽太守啓

謝隨王賜紫梨啓

謝隨王賜左傳啓

為宣城公拜章

為齊明帝讓封宣城公表

為明帝拜錄尚書表

為百官勸進明帝表

齊明帝謚冊文

齊敬皇后哀策文

為隨王祭東耕文

祭大雷周何二神文

為諸子祭阮夫人文

臨海公主墓誌銘

新安長公主墓誌銘

鬱林王墓銘

海陵王墓誌銘

為錄公拜揚州恩教

餉諸葛璩教

訓惠賦序

思歸賦序

林鴛鴦賦序

謝朓

與王儉書

與弟淪書

劉繪

為豫章王嶷上武帝請改葬故巴東王子響

表

虞羲

與蕭令王僕射為袁象求謚書

陸厥

與沈約問聲樂書

沈約答書

樂藹

與竟陵王子良牋

與右率沈約書

沈約答書

奏請朝直

何譔之

祭魚用鮮槁議

國子助教桑惠度議

功臣配饗議

伏曼容

服色宜依姓尚議

太子僕射周顒議

議五輅奏

太子對根周郎

庾曇隆

論郊壇立宮室啓

國子助教徐景嵩議

太學博士賀瑒議

驍騎將軍虞炎議

祠部郎李撝議

論封國啓

蕭琛

嗣君即位廟見議

曹思文

上諫廢學表

徐孝嗣

奏劾蕭元蔚等

上明帝立屯田表

婚禮表

張欣泰

移魏廣陵侯

曹虎

荅虜主元宏書

江祀

薦處士諸葛璩

張冲

報鄧元起書

庾弘遠 徐虎龍

為陳顯達與朝貴書

崔慰祖

與從弟緯書

崔覺

與妹書

崔偃

上和帝白父寃書

又疏

和帝詔報崔偃

蕭日南

上和帝

曹景宗

答弟義宗書

高爽

荅人書

謝赫

古畫品

卷第八

江淹

奏記詣宋南徐州新安王

到主簿日牋詣宋右軍建平王景素

被黜爲吳興令辭牋詣建平王

到功曹參軍牋詣齊驃騎竟陵公子良

獄中上建平王書
報袁叔明書

與交友論隱書

勅爲朝賢答劉休範書

爲建平王慶改號啓

爲建平王謝鎮南徐州刺史啓

爲建平王謝賜石硯等啓

爲建平王謝玉環刀等啓

蕭領軍讓司空并敦勸啓

蕭太尉子姪爲領軍江州兗州豫州淮南黃

門謝表

拜正員外郎表

拜中書郎表

建平王讓右將軍荊州刺史表

建平王慶明帝疾和禮上表

建平王慶安城王拜封表

建平王之南徐州刺史辭闕表

蕭驃騎讓封第二表
第三表

蕭驃騎錄尚書事到省表

蕭驃騎謝甲仗入殿表

蕭驃騎讓豫司二州表

蕭驃騎上頓表

蕭驃騎謝被侍中慰勞表

蕭驃騎慶平賊表

蕭驃騎解嚴輪黃鉞表

蕭驃騎讓太尉增封第三表

蕭驃騎讓太尉增封表

蕭驃騎讓油幢表

蕭太尉上便宜表

讓太傅揚州牧表

蕭重讓揚州表

後讓太傅揚州牧表

蕭被侍中敦勸表

蕭被尚書敦勸重讓表

蕭讓劔履殊禮表

蕭拜太尉揚州牧表

蕭太傅謝追贈父祖表

蕭太傅辭輿駕親幸表

蕭讓前部羽葆鼓吹表

謝開府辟召表

蕭讓太傅相國齊公十郡九錫表

第二表

被百僚敦勸受表

蕭拜相國齊公十郡九錫表

一作章

蕭相國讓進爵為王第二表

蕭相國拜齊王表

齊王謝冕旒諸法物表

齊王讓禪表

卷第九

江淹

始安王拜征虜將軍丹陽尹章

始安王拜征虜將軍南兗州刺史章

建平王慶少帝登祚章

建平王荅王太后正位章

建平王慶江皇后正位章

建平王拜右衛將軍荊州刺史章

蕭領軍拜侍中刺史章

建平王散五刑教
建平王聘隱逸教

蕭驃騎發徐州三五教

蕭驃騎築新亭壘埋枯骸教

蕭太傅東耕教
遣大使巡詔

賜赦交州詔
斷募士詔

封江冠軍等詔
大赦詔

北伐詔

王僕射為左僕射詔

王撫軍為安東吳興詔

曲赦丹陽等四郡詔

王僕射領太子詹事詔

何詹事為吏部尚書詔

王侍中為南蠻校尉詔

王光祿為征南湘州詔

柳僕射為南充州詔 王僕射加兵詔

立學詔

王鎮軍為中書令右光祿詔

張令為太常領國子祭酒詔

蕭冠軍進號征虜詔

褚侍中為征北長史詔

尚書符

尚書符征西府討沈攸之

慰勞雍州文

袁友人傳

建平王太妃周氏行狀

齊太祖高皇帝誄

宋故尚書左丞孫緬墓誌文

宋故安成王右常侍劉喬墓誌文

宋故銀青光祿大夫孫夙墓誌文

齊故御史中丞孫詵墓誌文

齊故司徒右長史檀超墓誌文

蕭驃騎祭石頭戰亡文

蕭太傅東耕呪文

卷第三

江淹 三

雲山讚四首

銅劍讚

草木頌十五首

雜體詩三十首序

倡婦自悲賦序

青苔賦序

石蛙賦序

蓮華賦序

丹砂可學賦序

赤虹賦序

橫吹賦序

傷友人賦序

知已賦序

學梁王兔園賦序

傷愛子賦序

遂古篇序

雜三言序

自序

尚書殿中曹

廟樂歌詩奏

淮陰太守

移虜淮陰太守文

有司奏封氏王楊集始母

八座奏進號陰平王楊炅

芮芮國相邢基社羅迴

奉高帝表

百濟國王牟大

上武帝表

又表

武帝命牟大襲封百濟王策

制詔

上明帝表

又表

扶南國王僑陳如闍耶跋摩

上武帝表

又

天竺道人那伽仙

上武帝書

武帝詔報

祥瑞志

會稽刻石山大石文

立石文

小石文

嵩高山石璽文

有司奏沸泉木簡文

璽文

銅獸銘

南齊文紀目錄

畢

文

南齊文紀卷第一

遼東遲日豫叅定

閩莆余

颺訂閱

江東梅鼎祚纂輯

高帝

姓蕭名道成字紹伯南蘭陵人仕宋位相國封齊王篡宋國號齊都建業在位四年廟曰

太祖

與中書令褚淵衛將軍袁粲書

太祖既平桂陽王休範遷散騎常侍中領軍南兗州刺史進爵為公增邑二千戶固讓與淵及粲書淵粲書答之太祖乃受命

下官常人志不及遠隨運推斥妄踐非涯才輕任重夙宵冰惕近值國危含氣同奮况在下官寧吝身命

履冒鋒炭報効恒理而褒嘉之典偏見甄沐貴登端
戎秩加爵土瞻言霄衢魂神震墜下官奉上以誠率
性無矯前後忝荷未嘗固讓至若今授特深惟迫寔
以銜恩先旨義兼陵闕識蔽防萌宗戚構禍引誚歸
咎既已醜顏乃復乘災求幸藉亂取貴斯實國家之
恥非臣子所忍也且榮不可濫寵不可昧乞蠲中候
請停增邑庶保止足輸効淮湄如使伐匈奴凱歸反
旆以此受爵不復固辭矣

褚淵袁粲答太祖書

粲見前
淵見後

來告穎亮敬挹無已謙貶居心深承非飾此誠此旨

久著言外况復造席舒衿迂翰緒意推情顧已信足
書紳但今之所宜商榷必以輕重相推世惟多難事
屬雕弊四維惟擾邊氓未安國家費廣府藏須備北
狄侵邊憂虞交切寓內含識尚爲天下危心相與共
荷任寄若此當可稍修廉退不求之懷抱實謂不可
了其不可理無固執且勅寇窮凶勢過原燎釁逆倉
卒終古未聞常時懼惑當慮先定結壘新亭枕戈待
敵斷決之策寔有由然鋒鏑初交元惡送首摠律制
奇判於此舉裂邑萬戶登爵槐鼎亦何足少酬勳勞
粗塞物聽今以近侍禁旅進昇中候乘平隨牒取此

非叨濟河昔所履牧鎮軍秩不逾本詳校階序愧在
未優就加冲損特虧朝制奉職數載同舟無幾劉領
軍峻節霜明臨危不顧音迹未晞奄成今古迷途失
偶慟不及悲戎謨內寄恒務倍急秉操辭榮將復誰
委誠惟軍柄所期自增茂圭社誓貫朝廷匹夫里語
尚欲信厚君令必行逡巡何路凡位居物首功在衆
先進退之宜當與衆共苟殉獨善何以處物受不自
私彌見至公表裏詳究無而後可想體殊常深思然
納並南齊書○桂陽兵至太祖決計出頓新亭領軍
劉勳戰歿太祖從石頭濟淮入衛遣諸將擊平之

與王廣之書

廣之字林之沛郡相
人歷侍中鎮軍將軍

廣之仕宋歷徐州刺史鍾離太守沈攸之事
起廣之留京師太祖誅黃回回弟駟及從弟
馬兄子奴亡逸與廣之書令於江西捕駟等
○回本竟陵郡軍人累戰功為鄂州刺史嘗
圖與袁粲攻太祖事不果太祖撫之
如舊後改南兗州以潛侮表奏誅之

黃回雖有微勳而罪過轉不可容近遂啓請御大小
二輿為刺史服飾吾乃不惜為其啓聞政恐得輿復
求畫輪車此外罪不可勝數弟自悉之今啓依法

與虞玩之書

玩之字茂瑤會稽餘
姚人歷光祿大夫

玩之元徽中為右丞太祖參政與玩之書玩
之上表陳府庫錢帛器械役力州縣轉多興
用漸廣慮不支歲
月朝議優報之

張華為度支尚書事不徒然今漕藏有闕吾賢居右

丞已覺金粟可積也

與劉俊書

俊字士操彭城上里人歷五兵尚書

俊司空勔之子勔於大桁戰死俊時疾病扶服路次號哭求屍持喪墓側冬月不衣絮太祖代勔領軍素與勔善書譬俊

承至性毀瘵轉之危慮深以酸怛終哀全生先王明軌豈有去縑纊徹温席以此悲號得終其孝性耶當深顧往旨少自抑勉

與王延之書

延之字希季瑯琊臨沂人敬弘孫歷吏部尚書僕射

王延之阮韜俱是劉湛外甥並有蚤譽湛甚愛之嘗曰韜後當為第一延之其次也延之甚不平後為江州每致餉下都韜與朝士同例太祖與延之書○尺牘作世祖書誤

韜云卿未嘗有別意當緣劉家月旦故耶

世說○緣南史作由

與崔祖思書

祖思見後

明僧紹字承烈平原鬲人宋永光中淮北沒虜乃南渡江弟慶符為青州僧紹乏糧食隨慶符之鬱洲住弁榆山栖雲精舍太祖徵為正員外郎稱疾不就與崔祖思書慶符罷任僧紹隨歸住江乘攝山祖思時假節督青冀二州刺史

明居士標意可重吾前旨竟未達耶小涼欲有講事卿可至彼具述吾意令與慶符同歸

又

不食周粟而食周薇古猶發議在今寧得息談耶聊以為笑

與世祖書

世祖見後

柳世隆為晉熙王安西司馬世祖為長史太祖之謀渡廣陵也令世祖率眾下同會京邑是時朝廷疑憚沈攸之密為之防劉懷珍白夏口兵衝要地宜得其人太祖與世祖書

汝既入朝當須文武兼資人與汝意合者委以後事

世隆其人也

以上並高帝在宋時與廷之書或即帝位後

築壘教

高帝既弒蒼梧立順帝威權日盛昇明元年表粲等皆以謀泄被誅詔假黃鉞

率大眾出屯新亭中興堂治嚴築壘教曰

河南稱慈諒由掩齒廣漢流仁實存殯朽近袁製茲營崇溝峻壘古墟曩隧時有湮移深松茂草或致刊薙憑軒動懷巡隍增愴宜並為收改葬並設薄祀

並南

齊書○江淹集載小異不兩存

數沈攸之罪惡檄

攸之自江陵起兵攻郢城時高帝輔政遣眾軍西討出頓

新亭馳檄數攸之罪惡

夫彎弓射天未見能至揮戈擊地多力安施何則逆順之勢定殊禍福之驗易原也是以違乎天者鬼神不能使其成會乎人者聖哲不能令其毀故劉滸賴七國連兵之勢隗躡恃跨河據隴之資毋丘儉伐其踰海越島之功諸葛誕矜其待士愛民之德彼四子者皆當世雄傑以犯順取禍覆窟傾巢為豎子笑况乎行陳凡才斗筭小器而懷問鼎之志敢搆無君之

逆哉逆賊沈攸之出自萊畝寂寥累世故司空沈公
從父宗蔭愛之若子卯翼吹噓得升官秩廢帝昏悖
猜畏柱臣攸之貪競乘機凶忍趨利躬行反噬請銜
誅旨又攸之與譚金童太壹等並受寵任朝爲牙爪
同功共體世號三侯當時親昵情過管鮑遭仰革運
凶黨懼戮攸之狡狎用數圖全賣禍既殺從父又害
良朋雖呂布販君酈寄賣友方之斯人未足爲酷此
其不信不義言詐反覆諸夏之所未有夷狄之所不
爲也泰始開闢網漏吞舟略其凶險取其搏噬故得
階亂獲全因禍保福攸之空淺躁而無謀濃湖崩挫

本非已力及北伐彭泗望賊宵奔重討下邳一鼓而
遁再鄙王師又應肆法先帝英聖量深河海宥其回
谿之敗冀收曲峭之捷故得推遷幸會頓升崇顯內
端戎禁外臨方牧聖靈鼎湖遠頒顧命託寄崇深義
感金石而攸之知奉國諱喜見于容普天同哀已以
爲慶此其樂禍幸災大逆之臯一也又攸之累登蕃
兵自郢遷荆晉熙殿下以皇弟代鎮地尊望重攸之
肆情陵侮斷割候迎料擇士馬簡筭器甲精器銳士
並取自隨郢城所留十不遺一專擅略虜罔顧國典
此其包藏禍心不恭不虔大逆之臯二也又攸之踐

荆以來恒用姦數既欲發兵宜其因假遂乃蹙迫群蠻騷擾山谷揚聲討伐盡戶撥上蟻聚郭邑伺國盛衰從來積年永不解甲遂使四野百縣路無男人耕田載租皆驅女弱自古酷虐未聞有此其侮蔑朝廷大逆之臯三也去昔桂陽竒兵起京師內燹宗廟阡危攸之任居上流兵強地廣救援顛沛寔宜悉力國家倒懸方思身慮威遣弱卒三千並皆羸老使就郢州稟受節度欲令判否之日委臯晉熙何其平日輒張寔輕周召爾時恭謹虛重皇戚此其伏慝藏詐持疑兩端大逆之臯四也又攸之累據方州跋扈滋

甚招誘輕狡往者咸納羈絆行旅過境必留仕子窮困不得歸其鄉商人畢命無由還其土叛亡入境輒加擁護逋逃出界必遣窮追此其大逆之臯五也又攸之自任專恣恃行慘酷視吏若讎遇民如草峻太半之賦暴參夷之刑鞭捶國士全用虜法一人逃亡闔宗補代毒徧嬰孩虐加班白獄囚恒滿市血常流男不得耕女不得織奔馳道路號哭動天皇朝敕令初不遵奉欲殺欲擊故曠蕩之澤長隔彼州此其無君陵上大逆之臯六也蒼梧狂凶釁深桀紂猜貳外蕃鷄目西顧留其長息元琰以爲交質父子分張彌

積年稔賴社稷靈長獨夫造戮攸之豫稟心靈宜同
歡幸遂迷惑顛倒深相嗟惜舉言哀桀揚聲吠堯此
其不辨是非罔識善惡違情背理大逆之梟七也廢
昏立明先代盛典交廣先到梁秦蚤及而攸之密邇
內畿川塗弗遠驛書至止晏若不聞未遣表章奄積
旬朔防風後至夏典所誅此其大逆之梟八也昇明
肇曆恩深澤遠申其父子之情矜其骨肉之恩馳遣
元琰銜使西歸並加崇授寵貴重疊元琰達西便應
反命攸之得此集聚蒙誰之恩不荷盛德反生讎讟
此其大逆之梟九也攸之以谿壑之性含梟鴟之腸

直置天壤已稱醜穢况乃舉兵內侮逞肆姦回斯寔
惡熟罪成之辰決癰潰疽之日幕府過荷朝寄義百
常憤董司元戎龔行天罰今皇上聖明將相仁厚約
法三章輕刑緩賦年登歲阜家給人足上有惠和之
澤下無樂亂之心攸之不識天時妄圖姦逆舉無名
之師驅怨讎之黨是以朝野審其易取含識判其誠
禽熊羆厲爪蓄攫裂之心虎豹磨牙起吞噬之憤鼓
怒則冰原激電奮發則霜野奔靄以此定亂豈移晷
刻雖復衆徒梗陸舉郡阻川何足以抗沸海之濤當
燒山之焰彼土士民罹毒日久逃竄無路常所憫然

今復相逼起接鋒刃交戰之日蘭艾難分土崩倒戈
宜為蚤計無使一人迷昧而九族就禍也弘宥之典
有如皎日

上宋順帝請誅黃回表

回本竟陵郡軍人累有戰功封侯爵宋元徽中

沈攸之起兵以回為郢州刺史出新亭為前鋒而袁粲據石頭將攻高帝回謀應粲不果攸之敗回至鎮固求為南兖州高帝以回終為禍亂乃上表後廢帝詔收付廷尉

黃回出自厮伍本無信行仰值泰始謬被驅馳階藉
風雲叨顯伍及沈攸之作逆事切戎機臣聞于知人
冀其搏噬遣統前鋒竟不接刃軍至郢城乘威迫脅
陵掠所加必先尊貴武陵王馬噐服咸被虜奪城內

文武剝剔靡遺及至還都縱恣彌甚先朝御服猶有
二輿弓劍遺思尚在車府回遂啓求以擬私用僭侮
無狀罔顧天極又廣納逋亡多受劫盜親信此等並
為爪牙觀其凶狡憂在不測惡積臯著非可含忍應
加剷除以明國憲尋其釁狀寔宜極法但嘗經將帥
微有塵露臯疑從輕事炳前策請在降減特原餘嗣
臣過荷隆寄言必罄誠謹陳管穴式遵弘典伏願聖
明特垂允鑒臣思不出位誠昧甄才追言既往伏增
慙慙

順帝詔報

黃回擢自凡豎夙負疵釁貫以憲綱收其搏噬雖勤
效累著而屠懷干紀新亭背叛投拜寇場異規既扇
廟律幾殆幸得張敬兒提戈直奮元惡受戮及景素
結逆履霜歲久乃密通音譯潛送器械氛沴克霽狡
謀方顯每存容掩冀能悛革故裂茅升爵均榮勲寵
凶詖有本險慝滋深構誘敬兒志相攻陷悖圖未遂
狠戾彌甚近軍次郢鎮劫逼府主兼挾私計多所徵
索主局咨疑便加捶楚專肆暴慢罔顧彝則膺牧西
蕃徽責惟厚曾不知感猶懷忿怨李安民述任河濟
星管未周貪據衿要若祈回奪黷謁弗已叨侈無度

遂請求御輿僭擬私飾又招萃賊黨初不啓聞傷風

蠹化莫此之甚宜明繩裁肅正刑書便收付廷尉依

法窮治

并宋書

即昨告天文

建元元年四月

皇帝臣

諱

敢用玄牡昭告皇皇后帝宋帝陟鑒乾序

欽若明命以命于

諱

夫肇自生民樹以司牧所以闡

極則天開元創物肆茲大道天下惟公命不于常昔

在虞夏受終上代粵自漢魏揖讓中葉咸炳諸典謨

載在方冊水德既微仍世多故寔賴

諱

匡拯之功以

弘濟于厥艱大造顛墜再構區宇宣禮明刑締仁緝

義畧緯凝象川岳表靈誕惟天人罔弗和會乃仰協
歸運景屬與能用集大命于茲辭德匪嗣至于累仍
而羣公卿士庶尹御事爰及黎獻至于百戎僉曰皇
天眷命不可以固違人神無託不可以曠主畏天之
威敢不祇從鴻曆敬簡元辰虔奉皇符升壇受禪告
類上帝以求答民衷式敷萬國惟明靈是饗

改元大赦詔

建元元年四月

五德更紹帝迹所以代昌三正迭隆王度所以改耀
世有質文時或因革其資元膺曆經道振民固以異
術同揆殊流共貫者矣朕以寡昧屬值艱季推肆勤

之誠藉樂治之數賢能悉心士民致力用獲拯溺龕
暴一匡天下業未叅古功殆侔昔宋氏以陵夷有徵
曆數攸及思弘樂推永鑒崇替爰集天祿于朕躬惟
志菲薄辭弗獲昭遂欽從天人式繇景命祇月正于
文祖升禋鬯于上帝猥以寡德光宅四海纂革代之
蹤託王公之上若涉淵冰罔知所濟寶祚初啓洪慶
惟新思俾利澤宣被億兆可大赦天下改昇明三年
爲建元元年賜人爵一級文武進位二等鰥寡孤獨
不能自存者穀人五斛逋租宿債勿復收有犯鄉論
清議賊汙淫盜一皆蕩滌洗除先注與之更始長徒

文系 南齊卷一 三百七十四
敕繫之囚特皆原遣亡官失爵禁錮奪勞一依舊典

降封宋公侯詔 建元元年四月

繼世象賢列代盛典疇庸嗣美前代令圖宋氏通侯
乃宜隨運省替但欽德懷義尚表墳閭况功濟區夏
道光民俗者哉降差之典宜遵往制南康縣公華容
縣公可為侯萍鄉縣侯可為伯減戶有差以繼劉穆
之王弘何無忌後

原赦詔 建元元年四月

宸運肇創寶命惟新宜弘慶宥廣敷蠲汰劫賊餘口
沒在臺府者悉原赦諸負豐流徒普聽還本土

省置屯稅詔 建元元年四月

自廬井毀制農桑易業鹽鐵防民貨鬻傷治歷代成
俗流蠹歲滋援拯遺弊革末反本使公不專利氓無
失業三宮諸王悉不得營立屯邸封略山湖太官池
籓宮停稅入優省置

減降宋氏第秩詔 建元元年五月

宸運革命引爵改封宋氏第秩雖宜省替其有預効
屯夷宣力齊業者一仍本封無所減降

斷眾募詔 建元元年五月江淹集載

設募取將懸賞購士蓋出權宜非曰恒制頃世艱險

浸以成俗且長逋逸開罪山湖是爲黥刑不辱亡竄
无咎自今以後可斷衆募

營卹遺櫬詔

建元元年六月

宋末頻年戎寇兼災疾凋損或枯骸不收毀櫬莫掩
宜速宣下埋藏營卹若標題猶存姓字可識可即運
載致還本鄉有司奏遣外監典事四人周行離門外
三十五里爲限其餘班下州郡無棺器標題者屬所
以臺錢供事

曲赦交趾詔

建元元年七月
江淹集載

交趾比景獨隔書朔斯乃前運方季負海不朝因迷
遂往歸款莫由曲赦交州部內李叔獻一人即撫南
土文武詳才選用并遣大使宣揚朝恩

錄序從軍官詔

建元元年十月

朕嬰綴世務三十餘歲險阻艱難備嘗之矣末路屯
夷戎車歲駕誠藉時來之運實資士民之力宋元微
二年以來諸從軍得官者未悉蒙祿可催速下訪隨
正即給才堪餘任者訪洗量序若四州士庶本鄉淪
陷簿籍不存尋校無所可聽州郡保押從寔除奏荒
遠闕中正者特許據軍簿奏除或戍扞邊役未由旋
反聽于同軍各立五保所隸有司時爲言列

建學詔

建元四年正月江淹集載

夫膠庠之典彝倫攸先所以招振才端啓發性緒弘
宇黎氓納之軌義是以五禮之迹可傳六樂之容不
泯朕自膺曆受圖志闡經訓且有司群僚奏議咸集
蓋以戎車時警文教未宣思樂泮宮永言多慨令關
燧無虞時和歲稔遠邇同風華夷慕義便可式遵前
准修建教學精選儒官廣延國胄

蠲戰亡租役詔

建元四年正月

比歲申威西北義勇爭先殞氣寇場命盡王事戰亡
蠲復雖有恒典主者遵用每傷簡薄建元以來戰亡
賞蠲租布二十年雜役十年其不得收屍主軍保押
亦同此例

詔朝臣

建元二年詔虞玩之上表陳其事納之

黃籍民之大紀國之治端自頃氓俗巧偽爲日已久
至乃竊注爵位盜易年月增損三狀貿襲萬端或戶
存而文書已絕或在而反託死叛停私而云隸役
身強而稱六疾編戶齊家少不如此皆政之巨蠹教
之深疵比年雖却籍改書終無得實若約之以刑則
民僞已遠若綏之以德則勝殘未易卿諸賢並深明
治體可各獻嘉謀以振澆化又臺坊訪募此制不近

優刻素定閑劇有常宋元嘉以前茲役恒滿大明以後樂補稍絕或緣寇難頻起軍蔭易多民庶從利投坊者寡然國經未變朝紀恒存相揆而言隆替何速此急病之洪源晷景之切患何以科筭能革斯弊耶

南齊書○杜氏通典民俱作人治俱作理死叛作死版勝殘未易作未易可懲

詔豫章王嶷嶷見後

太祖即位遷嶷為驃騎大將軍揚州刺史封豫章王會北虜動上思為經略乃詔嶷復以為南蠻校尉荆湘二州刺史

神牧摠司王畿誠為治要荆楚領馭遐遠任寄弘隆自頃公私凋盡綏撫之宜尤重恒日

與司徒褚淵手詔

柳世隆宋末為左將軍吳郡太守下母憂太祖踐阼起為南豫州刺史手詔與淵

向見世隆毀瘠過甚殆欲不可復識非直使人惻然實亦世珍國寶也

褚淵答

世隆至性純深哀過乎禮陛下在危盡忠喪親居憂杖而後起立人之本二理同極加榮增寵足以厲俗敦風

宥王遜詔

儉弟遜昇明中為丹陽丞告劉秉事不蒙封賞建元初為晉陵太守有怨言儉慮為禍因褚淵啓聞中丞陸澄依事舉奏詔曰

儉門世載德竭誠佐命特降刑書宥遜以遠徙永嘉郡

詔領軍將軍李安民

安民蘭陵承人歷吳興太守

淮北泗州聞太祖受命咸欲南歸徐州人桓標之兗州人徐猛子等合眾數萬砦險求援太祖詔安民安民赴救留遲虜急攻標之等皆沒上甚責之

青徐泗州義舉雲集安民可長轡遐馭指授羣帥

呂安國安集司州民戶詔

建元二年虜寇邊遣安國

郢司之間流雜繁廣宜並加區判定其隸屬參詳州事無專任安國可暫往經理以本官使持節總荆郢諸軍北討事屯義陽西關

詔周盤龍

建元二年虜寇壽春以盤龍為軍主助豫州刺史垣崇祖於西澤奮擊破

之上喜詔曰

醜虜送死敢寇壽春崇祖盤龍正勤義勇乘機電奮水陸斬擊填川蔽野師不淹晨西蕃尅定斯實將率用命之功文武爭伐之力凡厥勳勤宜時銓序可符列上

贈劉善明詔

善明忠誠夙亮幹力兼宣豫經夷險勤績昭著不幸殞喪痛悼于懷贈左將軍豫州刺史謚烈

手詔張融

融見後

融初辟太祖太傅掾太祖素奇好融即位後手詔賜融衣

見卿衣服麤故誠乃素懷有本交爾藍縷亦虧朝望今送一通故衣意謂雖故乃勝新也是吾所著已今裁減稱卿之體并履一量

詔夏侯恭叔

恭叔平西記室參軍上書以柳元景中與功臣劉劭殞身王事宜存封爵詔曰

與運隆替自古有之朝議已定不容復厝意也

徵明僧紹詔

朕側席思士載懷塵外齊郡明僧紹標志高栖耽情墳素幽貞之操宜加賁飾徵為正員外郎

封荷知加羅國王詔三韓種也建元元年國王荷知使來獻

量廣始登遠夷洽化加羅王荷知款關海外奉贄東遐可授輔國將軍本國王

詔答河南王吐骨渾拾寅

宋世遣建武將軍王世武使河南建元元年隨拾寅來獻詔答之

皇帝敬問使持節散騎常侍都督西秦河沙三州諸軍事車騎大將軍開府儀同三司領護羌校尉西秦河二州刺史新除驃騎大將軍河南王寶命葦授爰集朕躬猥當大業祗惕兼懷夏中增感王世武至得元徽五年五月二十一日表聞之濕熱想彼平安又

卿欵誠遙著保寧遐壘今詔升徽號以酬忠欵遣王世武銜命拜授又仍使王世武等往芮芮想得資遣使得時達又奏所上馬等物悉至今往別牒錦絳紫碧綠黃青等紋各十匹

楊廣香爲沙州刺史詔

廣香先奔虜宋末爲虜攻殺氏王楊文慶以爲

陰平公齊太祖即位欲綏懷異俗詔授廣香

昔絕國入贄美稱前冊殊俗內欵聲流往記僞虜葭蘆鎮主陰平郡公楊廣香怨結同族豐起親黨當宋之世遂舉地降敵葭蘆失守華陽暫驚近單使先馳宣揚皇威廣香等追其遠世之誠仰惟新之化肉袒

請附復地千里氏羌雜種咸同歸從宜時領納厚加優卹廣香翻迷反正可特量所授部曲酋豪隨名酬賞以廣香爲督沙州諸軍事平羌校尉沙州刺史

臨終詔司徒褚淵左僕射王儉

吾本布衣素族念不到此因藉時來遂隆大業風道沾被升平可期遘疾彌留至于大漸公等奉太子如事吾柔遠能邇緝和內外當令太子敦睦親戚委任賢才崇尚節儉弘宣簡惠則天下之理盡矣死生有命夫復何言

並南齊書

敕柳世隆

建元二年世隆進號安南將軍是時虜寇壽陽太祖敕世隆尋又敕之

歷陽城大恐不可卒治正宜斷隔之深為保固處分百姓若不將家守城單身亦難可委信也

又

吾更歷陽外城若有賊至即勒百姓守之故應勝割棄也

又

宋永初二年分淮東為南豫州治歷陽而淮西為豫州泰始中淮西沒復分淮東治南豫齊太祖建元二年垣崇祖既破虜上欲罷併二豫敕世隆遂省南豫至永明二年割揚州宣城淮南南豫州歷陽譙廬江臨江六郡復置南豫州

比思江西蕭索二豫兩辦為難議者多云省一足一於事為便吾謂非乃乖謬卿以為云何可具以聞

又

世隆建元四年出為使持節督南兗兗徐青冀五州軍事安北將軍南兗州刺史江北畏虜寇騷動不安上敕世隆

比有北信賊猶治兵在彭城年已垂盡或當未必送死然豺狼不可以理推為備或不可懈彼郭既無關要用宜開除使去金城三十丈政佳耳發民治之無嫌若作三千人食者已有幾米可指牒付信還民間若有丁多而細口少者悉令戍非疑也

又

昨夜得北使啓鍾離間賊已渡淮既審送死便當制加剿撲卿好參候之有急令諸小戍還鎮不可賊至

不覺也賊既過淮不容邇退散要應有處送歿者定
攻壽陽吾當遣援軍也

又

上遣軍助世隆并給軍糧虜退欲土斷江北又敕世隆

呂安國近在西土斷郢司二境上雜民大佳民殆無
驚恐又令垣豫州斷其州內商得崇祖啓事已行竟
近無云云殊稱前代舊意卿視竟部中可行此事不
若無所擾春便就手也

敕垣崇祖

初崇祖見上便自比韓信白起惟上獨許之及為豫州刺史有破虜功

陳顯達李安民皆增給軍儀啓上求鼓吹橫吹上敕給鼓吹一部

韓白何可不與眾異

又敕

崇祖為豫州刺史上遣使入關參虜消息還敕崇祖因修治芍陂田

卿視吾是守江東而已耶所少者食卿但努力營田
自然平殄醜虜

手敕劉懷慰

懷慰字彥泰平原人歷安陸于北中郎司馬本名聞慰

懷慰仕宋為步兵校尉齊國建置齊郡治瓜步以懷慰為輔國將軍齊郡太守因手敕之

有文事者必有武備今賜卿玉環刀一口

又敕

戴淵河東汾陰人除淮陵太守加寧朔將軍虜遣偽將薛道標寇壽春太祖以道標淵之親近敕懷慰令為淵書與道標示購之之意虜得書果追道標遣他將代之

聞道標分明來其兒婦竝在都與諸弟無復同生者
凡此類無為不多方悞之縱不全信足使豺狼疑惑

敕周山圖

山圖字季寂義興義陽人歷黃門郎領羽林四廂直衛

山圖為兗州刺史建元二年秋虜動上策虜必不出淮陰乃敕山圖虜果寇朐山

知卿綏邊撫戎甚有次第應變策略悉以相委恐列
醜未必能送死卿丈夫無可藉手耳

又敕

是時淮北四州起義上使山圖自淮入清倍道應赴又敕山圖會義眾已為虜所沒山圖拔三百家還淮陰

卿當盡相帥馭理每存全重天下事惟同心力山岳

可摧然用兵當使背後無憂慮若後冷然無橫來處
閉目痛打無不摧碎吾政應鑄金待卿成勳耳若不
藉此平泗州非丈夫也努力自運勿令他人得上功

敕周盤龍

盤龍北蘭陵人歷光祿大夫

軍主成買戍甬城虜圍買數重上遣領軍將軍李安民為都督救之敕盤龍

甬城漣口賊始復進西道便是無賊卿可率馬步下
淮陰就安民軍鍾離船少政可致衣仗數日糧軍人
扶淮步下也

又手敕

盤龍愛妾杜氏上送金釵鑷二十枚手敕曰

餉周公阿杜

手敕張岱 岱字景山吳郡吳人歷南兗州刺史

岱出為吳郡太守太祖知岱歷任清直至郡未幾手敕曰

大郡任重乃未欲回換但摠戎務殷宜須望實今用

卿為護軍加給事中

敕江謐掌吏部 謐建元三年為左民尚書諸皇子出閣文武主帥皆委謐尋敕

江謐寒士誠當不得競等華儕然甚有才幹堪為委

遇可遷掌吏部

敕崔文仲 文仲清河東武城人祖思宗人歷黃門郎領越騎校尉

文仲為徐州刺史建元三年淮北義民桓岳魂於抱犢固與虜戰大破之文仲馳啓上敕

北間起義者眾深恐良會不再至卿

能一時攘袂當遣一佳將直入也 並南齊書

手敕王珍國 珍國為南譙太守時郡境苦飢乃發米散財以拯窮乏高帝手敕

卿愛人治國甚副吾意也 梁書

報武陵王暉 暉字宜昭高帝第五子歷衛將軍

暉性剛穎雋出與諸王共作短句詩學謝靈運體以呈高帝帝報之

見汝二十字諸兒作中最為優者但康樂放蕩作體

不辯有首尾安仁士衡深可宗尚顏延之抑其次也

答陳顯達 顯達南彭城人歷侍中太尉東昏時起兵敗誅

顯達仕宋為廣州刺史沈攸之事起遣軍援臺至巴丘而攸之平太祖即位遷中護軍轉

護軍將軍顯達
啓讓上答之

朝廷爵人以序卿忠發萬里信誓如期雖屠城殄國
之勳無以相加此而不賞典章何在若未必宜爾吾
終不妄授於卿數示意同家人豈止於君臣耶過明
與王李俱祇召也

又虜寇壽陽以顯達為平北將軍南兗州刺史之鎮虜退敕顯達

虜經破散後當無復他關理但國家邊防自應過存
備豫宋元嘉二十七年後江夏王作南兗徙鎮野貽
沈司空亦以孝建初鎮彼正當以淮上要於廣陵耳
卿謂前代此處分云何今僉議皆云卿應據彼地吾

未能決乃當以擾動文武為勞若是公計不得憚之

答劉善明

善明為淮南宣城二郡太守撰賢聖雜語奏之託以諷諫太祖答之

省所獻雜語並列聖之明規眾智之深軌卿能憲章
先範纂鏤情識忠款既昭淵識肅著當以周旋無忘
聽覽也

又答

善明表諫起宣陽門及宜明守宰賞罰立學校制齊禮開賓館以接隣國上又答

具卿忠讜之懷夫賞罰以懲守宰飾館以待遐荒皆
古之善政吾所宜勉更撰新禮或非易制國學之美
已敕公卿宣陽門今敕停寡德多闕思復有聞

答蕭景先

景先太祖從子歷征虜將軍丹陽尹

景先啓稱上德
化之美上答之

風淪俗敗二十餘年以吾當之豈得頓掃幸得數載
盡力救蒼生者必有功于萬物也治天下者雖聖人
猶須良佐汝等各各自竭不憂不治也

敕答柳引

范柏年梓潼人泰始中除晉壽太守討平氏
賊為梁州刺史沈攸之事起柏年遣將聲援
京師而侯望形勢朝廷遣王玄邈代之說柏
年許啓為府左史因執誅之引稱啓太祖敕
答

柏年幸可不爾為之恨恨

答晉壽太守楊公則

楊文弘武都王氏人楊廣香之族先為白水
太守廣香死氏眾半奔文弘據白水公則啓
經略之宜
上答曰

文弘罪不可恕事中政應且加恩耳卿若能襲破白

水必加厚賞

武帝

名曠字宣遠高帝長子
在位十一年廟曰世祖

與虞棕手書

棕字景豫會稽餘姚人領
右軍將軍揚州大中正

宋昇明中世祖為中軍引棕為諮議
叅軍遣吏部郎江謐持手書謂棕

今因江吏郎有白以君情願意欲相屈

與玄元度書

建元二年魏主宏遣虜諸將分兵出竟青界
圍胸山戍主玄元度出擊大破之初元度自

云臂上有封侯志宋世以示世
祖時世祖在東宮書與元度

努力成臂上之相也

高帝喪禮詔 建元四年三月

喪禮雖有定制先旨每存簡約內官可三日一還臨外官間一日還臨後有大喪皆如之

原蕩諸城詔 建元四年三月

城直之制歷代宜同頃歲逋弛遂以萬計雖在憲宜懲而原心可亮積年逋城可悉原蕩自茲以後申明舊科有違糾裁

賑卹京師兩岸詔 建元四年三月

比歲未稔貧窮不少京師二岸多離其弊遣中書舍人優量賑卹

又詔 建元四年五月

頃水雨頻降潮流荐滿二岸居民多所淹漬遣中書舍人與兩縣官長優量賑卹

災異蠲卹詔 建元四年六月

水潦為患星緯乖序京都囚繫可剋日訊決諸遠獄委刺史以時察判建康秣陵二縣貧民加賑賜必令周悉吳興義興遭水縣蠲除租調

戍將恩慶詔 建元四年二月

緣淮戍將久處邊勞三元行始宜沾恩慶可遣中書
舍人宣旨臨會後每歲皆如之

優獎郡縣丞尉詔 永明元年正月

經邦之寄寔資莅民守宰祿俸盖有恒準往以邊虞
告警故沿時損益今區宇寧宴庶績咸熙念勤簡能
宜加優獎郡縣丞尉可還田秩

邦宰滿限詔 永元元年三月

宋德將季風軌陵遲列宰庶邦彌失其序遷謝遄速
公私凋弊泰運初基草昧惟始思述先範永隆治根
莅民之職一以小滿為限其有聲績剋舉厚加甄異

理務無庸隨時代黜

赦恩詔 永元元年三月

朕自丁荼毒奄便周忌瞻言負荷若墜淵壑而遠圖
尚蔽政刑未理星緯失序陰陽愆度思播先澤兼酬
天青可申辛亥赦恩五十日以期訖為始京師囚繫
悉皆原宥三署軍徒優量降遣都邑鰥寡尤貧詳加
賑卹

袁粲等葬事詔 永元元年四月

魏矜袁紹恩洽丘墓晉亮兩王榮覃餘裔二代弘義
前載美談袁粲劉秉與先朝同獎宋室沈攸之于景

和之世特有乃心雖末節不終而始誠可錄歲月彌
往宜特優降祭秉前年改葬塋兆未修材槨可爲經
理令粗足周禮攸之及其諸子喪柩在西者可符荆
州送反舊墓在所爲營葬事

小會青溪宮詔

永元二年七月

夫樂所自生先哲垂誥禮不忘本積代同風是以漢
光遲回于南陽魏文殷勤于譙國青溪宮體天含暉
則地棲寶光定靈源允集符命在昔期運初開經綸
方遠繕築之榮我則未暇時流事往未惟哽咽朕以
寡薄嗣奉鴻基思存締構式表王迹考星創制揆日
與功子來告畢規模昭備宜申釁落之禮以暢感尉
之懷可剋日小會

京師二縣沾賚詔

永元二年八月

窆枯掩骼義重前誥卹老哀癯寔惟令典朕永思民
瘼勿忘鑿寐聲慙未敷物多垂所京師二縣或有父
墳毀發可隨宜掩埋遺骸未櫬並加斂瘞疾病窮困
不能自存者詳爲條格竝加沾賚

興學詔

永明三年正月

春秋國語云生民之有學敦猶樹木之有枝葉果行
育德咸必由茲在昔開運光宅華夏方弘典謨克隆

教思命彼有司崇建庠塾甫就經始仍離屯故仰瞻
徽猷歲月彌遠今遐邇一體車軌同文宜高選學官
廣延胄子

又詔

守宰親民之要刺史按部所先宜嚴課農桑相土揆
時必窮地利若耕蠶殊衆足厲浮墮者所在即便列
奏其違方驕矜佚事妨農亦以名聞將明賞罰以勸
勤怠校覈殿最歲竟考課以申黜陟

永明三年蠲田租詔

五月

氓俗凋弊于茲永久雖年穀時登而歉乏比室几單
丁之身及熒獨而秩養養孤者並蠲今年田租

籍田詔

九穀之重八材爲末是故潔粢豐盛祝史無愧於辭
不籍千畝周宣所以貽諫昔期運初啓庶政草昧三
推之典我則未暇朕嗣奉鴻基思隆先軌載耒躬親
率由舊式可以開春發歲敬簡元辰鳴青鸞于東郊
冕朱紘而蒞事仰薦宗禋俯勗黔阜將使困庾內充
遺秉外物既富而教茲焉攸在

又詔

永元四年
閏正月

夫耕籍所以表敬親載所以率民朕景行前規躬執

良耜千畛咸事六稔可期教義克宣誠感薰暢重以
天符靈貺歲月鱗萃寶鼎開玉匣之祥嘉禾發同穗
之穎甘露凝暉于坳牧神爵騫翥于蘭囿斯乃宗稷
之慶豈寡薄所臻思俾休和覃茲黔阜見刑罪殊死
以下悉原宥諸逋負在三年以前尤窮弊者一皆蠲
除孝悌力田詳授爵位孤老貧窮賜穀十石凡欲附
農而糧種闕乏者並加給貸務在優厚

講武班賜詔

永元五年正月

今親閱六師少長有禮領馭羣帥可量班賜

春正普賜詔

永元五年正月

朕昧爽丕顯思康民瘼雖年穀亟登而饑饉代有今
履端肇運陽和告始宜協時休覃茲黎庶諸孤老貧
病竝賜糧餼遣使親賦每存均普

霖雨賑賜詔

永元五年六月

比霖雨過度水潦洿溢京師居民多離其弊遣中書
舍人二縣官長隨宜賑賜

優貸丹陽屬縣詔

永元五年七月

丹陽屬縣建元四年以來至永明三年所逋田租殊
為不少京甸之內宜加優貸其非中貲者可悉原停

九日詔

永明五年九月

九日出商飈館登高宴羣臣

蠲三調詔

永元五年九月

善爲國者使民無傷而農益勸是以十一而稅周道克隆開建常平漢載惟穆岱畎絲枲浮汶來貢杞梓皮革必緣楚往白水德將謝喪亂彌多師旅歲興飢饉代有貧室盡於課調泉貝傾於絕域軍國器用動資四表不因厥產咸用九賦雖有交貿之名而無潤私之實民咨塗炭寔此之由昔在開運星紀未周簡弊尚重農桑不殷于曩日粟帛輕賤于當年工商罕兼金之儲匹夫多飢寒之患良由圜法久廢上幣稍

寡所謂民失其資能無匱乎凡下貧之家可蠲三調二年京師及四方出錢億萬糴米穀絲綿之屬其和價以優黔首遠邦嘗市雜物非土俗所產者皆悉停之必是歲賦攸宜都邑所乏可見直和市勿使逋刻

原北兗八州租調詔

永元六年閏十月

北兗北徐豫司青冀八州邊接疆場民多懸罄原永明以前所逋租調

原雍州逋租詔

永元七年正月

雍州頻歲戎役兼水旱爲弊原四年以前逋租

又詔

春頒秋歛萬邦所以惟懷柔遠能邇兆民所以允殖
鄭渾宰邑因姓立名王濬剖符戶口殷盛今產子不
育雖稟常禁比聞所在猶或有之誠復禮以貧殺抑
亦情由俗淡宜節以嚴威敦以惠澤主者尋舊制詳
量附定蠲卹之宜務存優厚

贈俸詔

永元七年正月

諸大夫年秩隆重祿食殊薄豈所謂下車惟舊趨橋
敬老可增俸詳給見役

奉聖詔

永元七年二月

宣尼誕敷文德峻極自天發輝七代陶鈞萬品英風

獨舉素王誰匹功隱于當年道深于日月感麟厭世
緬邈千祀川竭谷虛丘夷淵塞非但洙泗湮淪至乃
饗嘗乏主前王敬仰崇修寢廟歲月亟流鞠爲茂草
今學敷興立寔稟洪規撫事懷人彌增欽屬可改築
宗祊務在爽塏量給祭秩禮同諸侯奉聖之爵以待
紹繼

婚禮詔

永元七年四月

婚禮下達人倫攸始周官設媒氏之職國風興及時
之詠四爵內陳義不期侈三鼎外列事豈存奢晚俗
浮麗歷茲永久每思懲革而民未知禁乃聞同宰之

費華泰尤甚膳羞方丈有過王侯富者扇其驕風貧者恥躬不逮或以供帳未具動致推遷年不再來盛時忽往宜爲節文頒之士庶並可擬則公朝方標供設合卷之禮無虧寧儉之義斯在如故有違繩之以法

婚葬崇儉詔

永元七年十月

三季澆浮舊章陵替吉凶奢靡動違矩則或裂錦繡以競車服之飾塗金鏤石以窮瑩域之麗至班白不婚露棺累葉苟相誇衒罔顧大典可明爲條制嚴勒所在悉使畫一如復違犯依事糾奏

永明八年七月大赦詔

陰陽舛和緯象愆度儲胤嬰患淹歷旬晷思仰祇天戒俯紓民瘼可大赦天下

並南齊書

寬黃籍謫役詔

初太祖別置板籍官置令史限人一日得數巧以防懈怠至永

明八年謫巧者成緣准各十年百姓怨望世祖乃詔曰

夫簡貴賤辨尊卑者莫不取信于黃籍豈有假器濫榮竊服非分故所以澄革虛妄式允舊章然豐起前代過非近失既往之讐不足追咎自宋昇明以前皆聽復注其有謫役邊疆各許還本此後有犯嚴加翦治

賑賜京師詔 永元十年十一月

頃者霖雨樵糧稍貴京邑居民多離其弊遣中書舍人二縣官長賑賜

水旱斷酒詔 永元十年五月

水旱成災穀稼傷弊凡三調眾逋可同申至秋登京師二縣朱方姑熟可權斷酒

沾卹二岸詔 永元十一年七月

頃風水為災二岸居民多離其患加以貧病六疾孤老稚弱彌足矜念遣中書舍人履行沾卹

又詔

水旱為災寔傷農稼江淮之間倉廩既虛遂草竊充斥互相侵奪依阻山湖成此逋逃曲赦南兗兗豫司徐五州南豫州之歷陽譙臨江廬江四郡三調眾逋宿債並同原除其緣淮及青冀新附僑民復除已訖更申五年

葬宋建平王景素詔

宋建平王劉景素名父之子雖末路失圖而原心有

本可聽以禮葬舊塋 景素父宣簡王宏文帝子

委皇太子長懋決獄詔 太子乃於宣猷堂錄三署囚原宥有差

獄訟之重政化所先太子立年作貳宜時詳覽此訊

事委以親決

增封豫章王嶷邑戶詔

永明二年

漢之梁孝寵異列蕃晉之文獻秩殊恒序况乃地侔前淮勲兼往式雖天倫有本而因事增情宜廣田邑用申恩禮增封爲四千戶

答豫章王嶷求解太傅詔

永明三年

公惟德惟行無所厝辭且魯且衛其誰與二方式範當時流聲史籍豈容屢秉撝謙以乖期寄

豫章王嶷喪事詔

凝明德至親勲高業始德懋王朝道光區縣奄至薨

逝痛酷抽割不能自勝柰何柰何今便臨哭九命之禮宜備其制歛以袞冕之服温明祕器命服一具衣一襲喪事一依漢東平王故事大鴻臚持節護喪事大官朝夕送奠大司馬太傅二府文武悉停過葬

豫章王嶷贈錫詔

寵章所以表德禮秩所以紀功慎終追遠前王之盛策累行疇庸列代之通誥故使持節都督揚南徐三州諸軍事大司馬領太子太傅揚州刺史新除中書監豫章王嶷體道秉哲經仁緯義挺清譽於弱齡發韶風於早日締綸霸業之初翼贊皇基之始孝睦著

於鄉閭忠諒彰乎邦邑及秉德論道摠牧神甸七教
必荷六府咸理振風潤雨無讐於時候卹民拯物有
篤於矜懷雍容廊廟之華儀刑列郡之觀神凝自遠
具瞻永集朕友于之深情兼家國方授以神圖委諸
廟勝緝頌九絃陪禪五岳天不憖遺奄焉薨逝哀痛
傷惜震慟乎厥心今先遠戒期龜謀襲吉宜加茂典
以協徽猷可贈假黃鉞都督中外諸軍事丞相揚州
牧綠綬綬具九服錫命之禮侍中太司馬太傅王如
故給九旒鸞輅黃屋左纛虎賁班劍百人輜輶車前
後部羽葆鼓吹葬送儀依東平王故事

褚淵喪事詔

司徒奄至薨逝痛怛慟懷比雖疋瘵便力出臨哭給
東園秘器朝服一具衣一襲錢二十萬布二百疋蠟
二百斤

贈褚淵太宰詔

夫褒德所以紀民慎終所以歸厚前王習祖盛典咸
必由之故侍中司徒錄尚書事新除司空領驃騎將
軍南康公淵履道秉哲鑒識弘曠爰初弱齡清風夙
舉登庸應務具瞻允集孝友著于家邦忠貞彰于亮
采佐命先朝經綸王化契闊屯夷綱繆終始摠錄機

衡四門惟穆諒以同規往古式範來今謙光彌遠屢
陳降挹權從高旨用虧大猷將登上列永翼聲教天
不憖遺奄焉薨逝朕用震慟于厥心其贈公太宰侍
中錄尚書公如故給節加羽葆鼓吹增班劔爲六十
人葬送之禮悉依宋太保王弘故事

贈王儉太尉詔

永明七年

慎終追遠列代通規褒德紀勳彌峻恒策故侍中中
書令太子少傅領國子祭酒衛軍將軍開府儀同三
司南昌公儉體道秉哲風宇淵曠肇自弱齡清猷自
遠登朝應務民望斯屬草昧皇基協隆鼎祚宏謨盛

烈載銘彝篆及贊朕躬徽績光茂忠圖令範造次必
彰四門允穆百揆時序宗臣之重情寄兼常方正位
論道永釐袞職弼茲景化以贊隆平天不憖遺奄焉
薨逝朕用震慟于厥心可追贈太尉侍中中書監公
如故給節加羽葆鼓吹增班劔爲六十人葬禮依故
太宰文簡公褚淵故事冢墓材官營辦謚文憲公

贈柳世隆司空詔

故侍中左光祿大夫貞陽公世隆秉德居業才兼經
緯少播清徽長弘美譽入參內禁出贊西牧專寄郢
郊剋挫巨猾超越前勲功著一代及摠任方州民頌

寬德翼教崇闈朝稱元正忠謨嘉猷簡于朕心雅志
素履邈不可踰將登玄味用變鴻化奄至薨殞震慟
良深贈司空班劔三十人鼓吹一部侍中如故謚曰
忠武

誅垣崇祖詔

豫章王嶷有盛寵于高帝世祖在東宮崇祖不自附結後漸疑異及

即位下詔誅之

垣崇祖凶詬險躁少無行業昔因軍國多虞採其一
夫之用大運光啓頻煩升擢溪壑靡厭浸以彌廣去
歲在西連謀境外無君之心已彰遐邇特加遵養庶
或俊革而猜貳滋甚志興亂階隨與荀伯玉驅合不

逞窺窬非覬構扇邊荒互爲表裏寧朔將軍孫景育
究悉姦計具以啓聞除惡務本刑茲罔赦便可收掩
肅明憲辟

誅張敬兒詔

敬兒以戰功爲雍州刺史歷開府儀同三司及垣崇祖誅常恐懼又遣使與蠻中交關世祖疑其有異志誅之

敬兒蠢茲邊裔昏迷不脩屬值宋季多難頗獲野戰
之力拔迹行伍超登非分而愚躁無已矜伐滋甚鎮
蒞本州久苞異志在昔含弘庶能懲革位班三槐秩
窮五等懷音靡聞姦回屢構去歲迄今嫖貳滋甚鎮
東將軍敬則丹陽尹安民每侍接之日陳其兇狡必

圖反噬朕猶謂恩義所感本質可移頃者已來釁戾
遂著自以子弟在西足動殊俗招扇羣蠻規擾樊夏
假託妖巫用相震撼妄設徵祥潛圖問鼎履霜於開
運之辰堅冰於嗣業之世此而可忍孰不可容天道
禍淫逆謀顯露建康民湯天獲商行入蠻備親姦計
信驛書翰證驗炳明便可收掩式正刑辟同黨所及
特皆原宥

贈李安民詔

安民歷位內外庸績顯著忠亮之誠每簡朕心效致
近畿方申任寄奄至殞喪痛傷于懷贈鎮東將軍鼓

吹一部常侍太守如

荅薛淵解職詔

淵自北南奔母索氏不得自拔私遣購贖報云已在界首事竟

無實淵上表解職詔曰

遠隔殊方聲問難審淵憂迫之深固辭朝列昔東關
舊典猶通婚宦况母出有差音息時至依附前例不
容申許便可斷表速還章服

賻高平太守戴僧靜詔

僧靜志懷貞果誠著艱難剋殄西墉勲彰運始奄致
殞喪惻愴傷懷賻錢五萬布百匹謚壯侯

驍騎將軍桓康喪事詔

文紀 卷一
康昔預南勲義兼常懷倍深惻愴凶事所須厚加料理

沈冲喪還詔

冲喪柩至止惻愴良深以其昔在南蕃特兼憫悼

追贈沈冲詔

冲貞詳閑理志局淹正誠著蕃朝績彰出守不幸早世朕甚悼之追贈太常謚曰恭子

蕭景先節度司州諸軍詔

永明五年

得雍州刺史張瓌啓事蠻虜相扇容或侵軼蜂蠆有毒移時剿蕩可遣征虜將軍丹陽尹景先摠率步騎

直指義陽可假節司州諸軍皆受節度

賻蕭景先喪詔

西信適至景先奄至喪逝悲懷切割自不勝任今便舉哀賻錢十萬布二百匹

贈蕭景先侍中詔

故假節征虜將軍丹陽尹新吳侯景先器懷開亮幹局通敏綢繆少長義兼勲戚夷著夷險績茂所司方升寵榮用申任寄奄至喪逝悲痛良深可贈侍中征北將軍南徐州刺史給鼓吹一部假節侯如故

誅王奐赦詔

逆賊王奐險詖之性自少及長外飾廉勤內懷凶慝
貽戾鄉伍敢棄衣冠拔其文筆之用擢以顯任出牧
樊阿政刑弛亂第三息彪矯弄威權父子均勢故寧
蠻長史劉興祖忠于奉國每事匡執奐忿其異已誣
以訕謗肆怒囚錄然後奏聞朕察奐愚詐詔送興祖
還都乃懼姦謀發露潛加殺害欺罔既彰中使辯覈
遂受兵登陴逆捍王命天威電掃義夫咸奮曾未浹
辰罪人斯獲方隅克殄漢南肅清自非犯官兼預同
逆謀爲一時所驅逼者悉無所問

長沙王妃詔

奐以逆誅弟伯女爲長沙王妃世祖詔

奐自陷逆節長沙王妃男女並長且奐又出繼前代
或當有准可特不離絕

贈蕭叡明詔

龍驤將軍安西中兵參軍松滋令蕭叡明愛敬淳深
色養盡禮喪過乎哀遂致毀滅雖未達聖教而一至
可愍宜加榮命以矜善人可贈中書郎

封茹法亮詔

世祖鎮湓城法亮爲上江州典籤善於承奉稍見委信

茹法亮近在盆城頻使銜命內宣朝旨外慰三軍義
勇齊奮人百其氣險阻艱難心力俱盡宜沾茅土以
甄忠績封望蔡縣男食邑三百戶

封范當根純林邑王詔

林邑初楊邁子孫相傳為王夷人范當根純攻

奪之永明九年遣使貢獻下詔

林邑蠢爾介在遐外世服王化當根純乃誠款懇到率其遼職遠績克宣良有可嘉宜沾爵號以弘休澤可持節都督緣海諸軍事安南將軍林邑王

河南王吐骨渾易侯度進號詔

吐骨渾拾寅子永明三年詔

易度侯守職西蕃綏懷允緝忠績兼舉朕有嘉焉可進號車騎大將軍

拜武都王楊集始詔

楊後起卒

後起奄至殞逝惻愴予懷綏禦邊服宜詳其選行輔

國將軍北秦州刺史武都王楊集始幹局沉亮乃心忠款必能緝境寧民宣揚聲教可持節輔國將軍北秦州刺史平羌校尉武都王

詔報宕渠王梁彌承

宕昌使求軍儀及伎雜書詔報之

知須軍儀等九種竝非所愛但軍器種甚多致之未易內伎不堪涉遠祕閣圖書例不外出五經集注論今特敕賜王各一部

封宕昌王梁彌頡詔

行宕昌王梁彌頡忠款內附著績西服宜加爵命式

隆藩屏可使持節督河涼二州諸軍事安西將軍東
羌校尉河涼二州刺史隴西公宕昌王

詔報芮芮國

芮芮求醫工等
物世祖詔報之

知須醫及織成錦工指南車漏刻竝非所愛南方治
疾與北土不同織成錦工竝女人不堪涉遠指南車
漏刻此雖有其器工匠久不復存不副爲悞

並南
齊書

遺詔

永明十一年七月

始終大期賢聖不免吾行年六十亦復何恨但王業
艱艱萬機事重不能無遺慮耳太孫進德日茂社稷
有寄子良善相毗輔思弘治道內外衆事無大小悉
與諱參懷共下意尚書是職務根本悉委王晏徐
孝嗣軍旅捍邊之略委王敬則陳顯達王廣之王玄
邈沈文季張瓌薛淵等百辟庶僚各奉爾職謹事太
孫勿有懈怠知復何言

又詔

我識滅之後身上著夏衣畫天衣純烏犀導應諸器
服悉不得用寶物及織成等唯裝複袂衣各一通常
所服身刀長短二口鐵環者隨我入梓宮祭敬之典
本在因心東鄰殺牛不如西家禴祭我靈上慎勿以

牲為祭唯設餅茶飲干飯酒脯而已天下貴賤皆同
 此制未山陵前朔望設菜食陵墓萬世所宅意嘗悵
 休安陵未稱今可用東三處地最東邊以葬我名為
 景安陵喪禮每存省約不須煩民百官停六時入臨
 朔望祖日可依舊諸主六宮並不須從山陵內殿鳳
 華壽昌耀靈三處是吾所改制夫貴有天下富兼四
 海宴處寢息不容乃陋謂此為奢儉之中慎勿壞去
 顯陽殿玉像諸佛及供養具如別牒可盡心禮拜供
 養之應有功德事可專在中自今公私皆不得出家
 為道及起立塔寺以宅為精舍並嚴斷之唯年六十
 必有道心聽朝賢選序已有別詔諸小小賜乞及閤
 內處分亦有別牒內外禁衛勞舊諸帥左右悉付蕭
 謹優量驅使之勿負吾遺意也

敕廬陵王子卿

子卿字雲長武帝第三子隆昌時領司徒見殺

子卿為荊州刺史在鎮營造服飾多違制度上敕之

吾前後有敕非復一兩過道諸王不得作垂體格服
 飾汝何意都不憶吾敕耶忽作瑋瑁乘具何意已成
 不須壞可速送下純銀乘具乃復可爾何以作鐙亦
 是銀可即壞之忽用金薄裹箭脚何意亦速壞去凡
 諸服章自今不啓吾知復專輒作者後有所聞當復

得痛杖

又

汝比在都讀學不就年轉成長吾日翼汝美勿得敕如風過耳使吾失氣

敕晉安王子懋

子懋字雲昌武帝第七子歷雍州刺史見殺

子懋為雍州刺史世祖敕以邊略

吾比連得諸處啓所說不異虜必無敢送死理然為其備不可暫解今秋犬羊輩越逸者其亡滅之徵吾今亦行密纂集須有分明指的便當有大處分今將敕鎮守並部偶民丁有事即使應接連已敕更遣想

行有至者汝共諸人量覓可使人數往南陽舞陰諸要處參覘糧食最為根本更不憂人仗常行視驛亭馬不可有廢闕并約語諸州當其界皆爾不如法即

周章

又

吾敕荆郢二鎮各作五千人陣本擬應接彼耳賊若送死者更即呼取之已敕子真魚繼宗設公愍至鎮可以公愍為城主三千人配之便足汝可好以階級在意勿得人求或超五三階級文章詩筆乃是佳事然世務彌為根本可常憶之汝所啓仗此悉是吾左

右御仗也云何得用之品格不可垂吾自當優量覓送

又

子懋啓求上所好書上荅之賜杜預手所定左傳及古今善言

知汝常以書讀在心足為深欣也

敕隨郡王子隆

子隆字雲興武帝第八子歷侍中中軍大將軍為明帝所害

謝朓為隨王鎮西功曹轉文學子隆在荊州好辭賦數集僚友朓以文才尤被賞愛流連

晤對不捨日夕長史王秀之以朓年少相動密以啓聞世祖敕曰

侍讀虞雲自宜恒應侍接朓可還都

敕王宴

晏字子彥瑯琊臨沂人弘之孫歷吏部尚書侍中尚書令明帝時被誅

柳世隆歷侍中左光祿祿大夫薨世祖敕晏

世隆雖抱疾積歲志氣未衰翼醫藥有效痊差可期

不謂一旦便為異世痛怛之深此何可言其昔在郢

誠心夙悃全保一蕃勲業克著尋准契闊增泣悲咽

卿同在情亦當無已已耶

世隆為江夏內史行郢州事沈攸之反攻郢城不克

又

王儉改領中書監參掌選事其年薨晏啓及儉喪上荅之

儉年當富盛志用方隆豈意暴疾不展救護便為異

世奄忽如此痛酷彌深其契闊艱運義重常懷言尋

悲切不能自勝痛矣柰何往矣柰何

又

張緒字思曼吳人歷遷散騎常侍竟陵王子良領國子祭酒世祖敕晏子良竟不拜以緒領國子祭酒

吾欲令司徒辭祭酒以授張緒物議以為云何南史如何

敕劉祥祥字顯徵東莞呂人

祥性韻高疎輕言肆行歷臨川王驃騎從事中郎詳兄整為廣州卒官詳就整妻求還資事聞朝廷于朝士多所貶忽著連珠十五首以寄其懷有啓上者帝令御史中丞任遐奏付廷尉別遣敕祥乃徙廣州

卿素無行檢朝野所悉輕弃骨肉侮蔑兄嫂此是卿家行不足乃無關他人卿才識所知蓋何足論位涉

清途於分非屈何意輕肆口噉詆目朝士造席立言必以貶裁為口實翼卿年齒已大能自感厲日望俊華如此所聞轉更增甚誼議朝廷不避尊賤肆口極辭彰暴物聽近見卿影連珠寄意悖慢彌不可長卿不見謝超宗其才地二三故在卿前事殆是百分不一我當原卿性命令卿萬里思誓卿若能改革當令卿得還

敕曹虎虎見後魏

虎永明十年轉西陽王冠軍司馬廣陵太守上敕虎

廣陵須心腹非吾意可委者不可得處此任

救豫章內史虞棕

詳袁彖王
遂之奏

謝超宗令於彼賜自盡勿傷其形體

救中書舍人茹法亮

蕭惠休為廣州刺史罷
任獻奉頌資上救法亮

可問蕭惠休吾先使卿宣制答其勿以私祿足充獻
奉今段殊覺其下情厚於前後人問之故當不復私
耶吾欲分受之也

南郡王昭業贊冠辭

武帝使給事中太常
蕭惠基加冠祝曰

筮日筮賓肇加元服棄余幼志從厥成德親賢使能
克隆景福

醮酒辭

旨酒既清嘉盈既盈兄弟具在淑慎儀形永屆眉壽
於穆斯寧

鬱林王

名昭業字元尚文惠太子之
長子立一年明帝廢而弑之

即祚蠲減征調詔

朕以寡薄嗣膺寶政對越靈命欽若前圖思所以敬
守成規拱揖羣后哀荒在日有愴大猷宜育德振民
光昭睿範凡逋三調及眾債在今年七月三十日前
悉同蠲除其備償封籍貨鬻未售亦皆還主御府諸
署池田邸冶興廢沿革本施一時於今無用者詳所
罷省公宜權禁一以還民關市征賦務從優減

放遣北掠餘口詔

近北掠餘口悉充軍實刑故無小罔或攸赦撫辜興
仁事深睿範宜從蕩宥許以自新可一同放遣還復
民籍已賞賜者亦皆爲贖

序用勞人詔

往歲蠻虜協謀志擾邊服羣帥授略大殲凶醜革城
克捷及舞陰固守二處勞人未有沾爵賞者可分遣
選部往彼序用

量處貧吏詔

東西二省府國長老所積財單祿寡良以矜懷選部
可甄才品能推校年月邦守邑丞隨宜量處以貧爲
先

隆昌元年下州郡詔

執耜暫忘懸磬比室秉機或惰無褐終年非怠非荒
雖由王道不稂不莠寔賴民和頃歲多稼無爽遺秉
如積而三登之美未臻萬斯之基尚遠且風土異宜
百民舛務刑章治緒未必同源妨本害政事非一揆
冕旒屬念無忘夙興可嚴下州郡務滋耕殖相畝闢
疇廣開地利深樹國本克阜天民又詢訪獄市博聽
謠俗傷風損化各以條聞主者詳爲條格

追崇竟陵王子良詔隆昌元年

褒崇明德前王令典追遠尊親沿情所隆故使持節都督諸軍揚州事中書監太傅領司徒揚州刺史竟陵王新除督南徐州體睿履正神鑒淵邈道冠民宗具瞻允集肇自弱齡孝友光備爰及贊契協升景業燮曜台陛五教克宣敷奏端朝百揆惟穆寄重先顧任均負圖諒以齊暉二南同規往哲方憑保祐永翼雍熙天不憖遺奄焉薨逝哀慕抽割震于厥心今龜謀襲吉先遠戒期宜崇嘉制式引風烈可追崇假黃鉞侍中都督中外諸軍事太宰領大將軍揚州牧綠

綬綬備九服錫命之禮使持節中書監王如故給九旒鸞輅黃屋左纛輜輶車前後部羽葆鼓吹挽歌二部虎賁班劍百人葬禮依晉安平王孚故事

徵吳苞詔隆昌元年徵不就苞濮陽郵城人宋泰始中過江

處士濮陽吳苞栖志窮谷秉操貞固沈情味古白首彌厲徵太學博士

海陵王名昭文字季尚文惠太子第二子明帝廢鬱林立之一年復為所廢弒即位詔延興元年

太祖高皇帝英謀光大受命作齊世祖武皇帝宏猷冠世繼暉下武世宗文皇帝清明懿鑠四海宅心並

德漏下泉功昭上象聲教所覃無思不洽洪基式圖
景祚方融而天步多阻運鍾否剝嗣君昏忍暴戾滋
多棄侮天經悖滅人紀朝野重足遐邇側視民怨神
恫宗祧如綴賴忠謨肅舉霄漢廓清俾三后之業絕
而更紐七百之慶危而復安猥以冲人入纂乾緒載
懷馭朽若墜諸淵思與黎元共綏戩福大赦改元文
武賜位二等

新安國吏詔

延興元年

新安國五品以上悉與滿叙自此以下皆聽解遣其
欲仕者適其所樂

銓用淮關徭戍詔

延興元年

頃者以淮關徭戍勤瘁於行役故覃以榮階薄酬厥
勞勲狀淹留未集王府非所以急舍爵之典趣報功
之旨便可分遣使部往彼銓用

延興元年冬十月癸巳詔

周設媒官趣及時之制漢務輕徭在休息之典所以
布德弘教寬俗阜民朕君制八紘志敷九德而習俗
之風爲弊未改靜言多愠無忘昏昃督勸婚嫁宜嚴
更申明必使禽幣以時標梅息怨正廚諸役舊出州
郡徵吏民以應其數公獲二旬私累數朔又廣陵年

常遞出千人以助淮戍勞擾為煩抑亦苞苴是育今
並可長停別量所出諸縣使村長路都防城直縣為
劇尤深亦宜禁斷

南齊文紀卷第一

南齊文紀卷第二

晉陽張 煊叅定

閩莆余 颺訂閱

江東梅鼎祚纂輯

明帝

名鸞字景栖高帝兄始安貞王道生子封西昌侯廢鬱林海陵二王而自立在位五年廟

宗曰高

建武元年即位詔

皇齊受終建極握鏡臨宸神武重輝欽明懿鑠七百
攸長磐石斯固而王度中蹇天階荐阻嗣命多違蕃
豐孔棘宏圖景曆將墜諸淵宣德皇后遠鑒崇替憲
章舊典疇咨台揆允定靈策用集寶命于予一人猥

以虛薄續承大業仰繫鴻不顧臨兆民永懷先構若履春冰寅憂夕惕固識攸濟思與萬國播此惟新大赦天下改元宿衛身普轉一階其餘文武賜位二等逋租宿責換負官物在建武元年以前悉原除劫賊餘口在臺府者可悉原放負豐流徙並還本鄉

符斷稅役詔

建武元年

頃守職之吏多違舊典存私害公寔與民蠹今商旅稅石頭後渚及夫鹵借債一皆停息所在凡厥公宜可即符斷主曹詳為其制憲司明加聽察

斷任土恒貢詔

建武元年

邑宰祿薄俸微不足代耕雖任土作貢亦為勞費自今悉斷

銓叙耆齒詔

永明中御史中丞沈淵表百官年登七十皆令致仕並窮困私門高

宗建武元年詔曰

日者百司耆齒許以自陳東西二省猶沾微俸辭事私庭榮祿兼謝興言愛老寔有矜懷自縉紳年及可一遵永明七年以前銓叙之科

申枉舉直詔

建武元年

上覽易遺下情難達是以甘棠見美肺石流詠自月一視黃辭如有含枉不申懷直未舉者蒞民之司竝

任厥失

嚴課農桑詔

建武二年

食惟民天義高姬載蠶寔生本教重軒經前哲盛範
後王茂則布令審端威必由之朕肅辰巖廊思引風
訓深務八政永鑒在勤靜言日昃無忘寢興守宰親
民之主牧伯調俗之司宜嚴課農桑罔令游惰揆景
肆力必窮地利固修隄防考校殿最若耕蠶殊衆具
而名聞游怠害業即便列奏主者詳爲條格

罷東田諸役詔

建武二年

軌世去奢事殷哲后訓物以儉理鏡前王朕屬流弊
之末襲澆浮之季雖恭已弘化刻意隆平而禮讓未
興侈華猶競未覽玄風兢言集愧思所以還淳改俗
反古移民可罷東田毀興光樓并詔水衡量省御乘

修晉帝諸陵詔

建武二年

舊國都邑望之悵然况乃自經南面負宸宸居或功
濟當時德覃一世而塋壠攢穢封樹不修豈直嗟深
牧豎悲甚信陵而已哉昔中京淪覆鼎玉東遷晉元
締構伊始簡文遺詠在民而松門夷替埏路榛蕪雖
年代殊往撫事興懷晉帝諸陵悉加脩理并增守衛

學教詔

建武四年

嘉肴停俎定芳旨於必甘良玉在攻表珪璋於既就
是以陶鈞萬品務本為先經緯九區學敷為大往因
時康崇建庠序屯虞荐有權從省廢謳誦寂寥倏移
年稔永言古昔無忘旰晷今華夏又安要荒慕嚮締
脩東序寔允適時便可式依舊章廣延國胄弘敷景
業光被後昆

孔聖祀典詔

永泰元年

仲尼明聖在躬允光上哲弘厥雅道大訓生民師範
百王軌儀千載立人斯仰忠孝攸出玄功替被至德
彌闡雖反袂遐曠而祧薦靡闕時祭舊典秩比諸侯

頃歲以來祀典替俎豆寂寥牲奠莫舉豈所以克
昭盛烈永隆風教者哉可式循舊典詳復祭秩使牢
餼備禮欽饗兼申

誅王敬則詔

敬則為會稽太守歷進大司馬明

帝既多殺害敬則自以高武舊臣
心懷憂恐帝亦內相疑備諸子在都密以情
告徐州行事謝朓為計朓執使馳啓敬則聞
之乃起兵反戰敗斬
首諸子俱於宅賜死

謝朓啓事騰徐嶽列如右王敬則稟質凶猾本謝人
綱直以宋季多艱頗有齎力之用驅獎所至遂升崇
顯皇運肇基預聞末議功非匡國賞實震主爵冠執
珪身登衣袞固已風雅作刺縉紳側目而溪谷易盈

鳴梟難改猜心內駭醜辭外布永明之朝履霜有漸
隆昌之世堅冰將著從容附會朕有力焉及景歷惟
新推誠盡禮中使相望軒冕成陰乃媿迹愈興禍圖
茲構収合亡命結黨聚羣外候邊警內伺國隙元遷
兄弟中萃淵藪姦契潛通將謀竊發眇即姻家嶽又
邑子取據匪他昭然已信方召之美未聞韓彭之豐
已積此而可容孰寄刑典便可即遣収掩肅明國憲
大辟所加其父子而已凡諸註誤一從蕩滌

遣陳顯達北討詔

虜頻寇雍州衆軍不捷失沔北五郡永泰元年遣顯達北

討于南鄉奔敗御史中丞范岫奏免顯達官朝議不許優詔答之

晉氏中微宋德將謝蕃臣外叛要荒內侮天未悔禍
左衽亂華巢穴神州逆移年載朕肆膺景業踵武前
王靜言隆替思又區夏但多難甫夷恩化肇洽興師
擾衆非政所先用戢遠圖權緩北略冀戎夷知義懷
我好音而凶醜剽狡專事侵掠驅扇異類蟻聚西偏
乘彼自來之資撫其天亡之會軍無再駕民不重勞
傳檄以定三秦一麾而臣禹迹在此舉矣且中原士
庶久望皇威乞師請援結軌馳道信不可失時豈終
朝儀分命方嶽因茲大號侍中太尉顯達可暫輟槐
陰指授羣帥

答奏陳顯達詔

昔衛霍出塞往往無功馮鄧入關有時虧喪况公規
謨肅舉期寄無深見可知難無損威略方振遠圖廓
清朔土雖執憲有常非所得議

誅王晏詔

晏性便辟甚為太祖所親重遺詔以尚書事付晏隆昌元年高宗廢鬱林

晏即推奉以功轉尚書令封曲江縣侯然高宗心實猜薄晏及即位有告晏謀反者云於

南郊道中竊發乃召晏於華林省誅之下詔

晏閭閻凡伍少無特操階緣人乏班齒官途世祖在
蕃搜揚擢用棄略疵瑕遂升要重而輕跳險銳在貴
彌著猜忌反覆觸情多端故以兩宮所不容十手所

共指既內媿于心外懼憲牘掩迹陳痾多歷年載頻
授蕃任輒辭請不行事似謙虛情實詭伏隆昌以來
運集艱難匡贊之功頗有心力迺爵冠通侯位登元
輔綢繆恩寄朝莫均焉谿壑可盈無厭將及視天畫
地遂懷異圖廣求卜相取信巫覡論薦黨附遍滿臺
府令大息德元淵藪亡命同惡相濟劍客成羣弟詡
凶愚遠相脣齒信驛往來密通要契去歲之初奉朝
鮮于文粲備告姦謀朕以信必由中義無與貳推誠
委任覬能悛改而長惡易流構扇彌大與北中郎司
馬蕭毅臺隊主劉明達等尅期竊發以河東王鉉識

用微弱可爲其主得志之日當守以虛器明達諸辭
炳然具存昔漢后以反脣致討魏臣以虬鬚爲戮况
無君之心既彰陵上之迹斯著此而可容誰置刑辟
並可收付廷尉肅明國典

誅蕭湛詔

湛世祖時轉左中郎將密事皆使參
掌鬱林即位又深委信湛附高宗勸

行廢立高宗初許事克用爲揚州及即
位轉南徐州湛甚恚怨建武二年賜死

蕭湛擢自凡庸識用輕險因藉倖會早預驅馳未明
之季曲頒恩紀鬱林昏悖頗立誠効寵靈優渥期遇
兼隆內摠戎柄外暢蕃威兄弟榮貴震灼朝野曾不
感佩殊荷少荅萬一自以勳高伊霍事均難賞才冠

當時恥居物後矯制王權與奪由已空懷疑懼坐構
嫌猜覘候宮掖希覬非望蔽上罔下之心誣君不臣
之跡固以彰暴民聽喧聒遐邇遂潛散金帛招集不
逞交結近衛互爲脣齒密契戚邸將肆姦逆朕以其
任寄既重爵列河山每加彌縫弘以大信庶能懷音
翻然悛改而豺狼其性凶謀滋甚夫無將必戮陽秋
明義况豐積禍盈若斯之大可收付廷尉速正刑書
罪止元惡餘無所問

江斲讓賻詔

斲領晉安王師卒遺令儉約不受
賻贈詔賻錢三萬布百匹子蒨啓

讓不受

數貽厥之訓送終以儉立言歸善益有嘉傷可從所請

手詔王思遠

顧嵩之字士明吳人有義行為安西諮議兼著作與思遠並屬文章

建武初以疾歸高宗手詔與思遠

此人殊可惜

賜謝朓詔

朓為吳興太守建武四年詔徵為侍中中書令抗表不應築室郡之西郭

明帝下詔

夫超然榮觀風流自遠蹈彼幽人英華罕值故長揖楚相見稱南國高謝漢臣取貴良史新除侍中中書令朓早藉羽儀夙標清尚登朝樹績出守馳聲遂歛

跡康衢拂衣林岵抱箕隸之餘芳甘顛顛而無悶撫事懷人載留欽想宜加優禮用旌素槩可賜牀帳褥席俸以卿祿常出在所

梁書

贈仇池公楊元秀詔

仇池公楊元秀氏王苗胤乃心忠勇醜虜凶逼血誠彌厲宣播朝威招誘戎種萬里齊契響然歸從誠効顯著寔有可嘉不幸殞喪悽愴于懷夫死事加恩陽秋明義宜追覃榮典以弘勸獎贈仇池公

氏王楊馥之為仇池公詔

氏王楊馥之世纂忠義率厲部曲樹績邊城克殄姦

醜復內稟朝律外撫戎荒欵心世昭朕甚嘉之以為
持節督北秦雍二州諸軍事輔國將軍平羌校尉北
秦州刺史仇池公沙州刺史

遺詔

徐令可重申八命中書監本官悉如故沈文季可左
僕射常侍護軍如故江柘可右僕射江祀可侍中劉
暄可衛尉軍政大事委陳太尉內外眾事無大小委
徐孝嗣遙光坦之江柘其大事與沈文季江祀劉暄
參懷心膂之任可委劉悛蕭惠休崔慧景

敕傅昭

昭字茂遠北地靈州人入梁歷散騎常侍

明帝踐阼引昭為中書通事舍人時居此職皆勢傾天下昭獨廉靖器物率陋身安麤糲常插燭于版牀明帝賜漆合燭盤等敕曰

卿有古人之風故賜卿古人之物 梁書

東昏侯

名寶卷字智藏明帝第二子立三年為蕭衍所廢尋弑之

誅徐孝嗣沈文季詔

孝嗣受高宗遺託為中書監末元初輔政東昏失德

將圖廢立而遲疑不決羣小言於上召入華林省同左僕射沈文季賜死

周德方熙三監迷叛漢曆載昌宰臣構戾皆身膏斧
鉞族同煙燼殷鑒上代垂戒後昆徐孝嗣憑藉世資
早蒙殊遇階緣際會遂登台鉉匡翼之誠無聞諂黷
之迹屢著沈文季門世 後缺

和帝

名寶融字智昭明帝第八子蕭衍立在此二年禪于梁

舉義覃惠教

帝初封隨郡王改封南康王為荆州刺史永元二年冬長史蕭穎胄

奉雍州刺史蕭衍舉義討東昏侯教纂嚴又教

吾躬率晉陽剪此凶孽戎事方勤宜覃澤惠所領內

繫囚見徒罪無輕重殊死以下皆原遣先有位者即

復本職將吏轉一階從征身有家口停鎮給廩食凡

諸雜役見在諸軍帶甲之身克定之後悉免為民其

功效賞報別有科條

普除東征眾軍詔

中興元年四月

荆雍義舉所基實始王迹君子勞心細人盡力宜加

酬獎副其乃誠凡東討眾軍及諸嚮義之眾可普復

除

並南齊書巴陵王寶義為太尉領司徒詔云不言之化形于自遠

宣德王太后

名寶明琅邪臨沂人文惠太子妃鬱林即位尊為皇太后至梁天監中薨

隆昌元年七月令

太孫即位明帝為新安王輔政相疑異遂矯太后令廢帝

為鬱林王而立海陵○明帝既弑鬱林須太后令徐孝嗣於袖中出而奏之見本傳

鎮軍車騎左僕射前將軍領軍左衛衛尉八座自我

皇曆啓基受終于宋睿聖繼軌三葉重光太祖以神

武創業草昧區夏武皇以英明提極經緯天人文帝

以上哲之資體元良之重雖功未被物而德已在民

三靈之眷方永七百之基已固嗣主特鍾沴氣爰表

弱齡險戾著于綠車愚固彰于宗正狗馬是好酒色
方涵所務惟鄙事所疾唯善人世祖慈愛曲深每加
容掩翼年志稍改立守神器自入纂鴻業長惡滋甚
居喪無一日之哀縗經爲歡宴之服昏酣長夜萬攄
斯墜發號施令莫知所從闡豎徐龍駒專總樞密奉
叔珍之互執權柄自以爲任得其人表裏緝穆邁蕭
曹而愈信布倚太山而坐平原于是恣情肆意罔顧
天顯二帝姬嬪並充寵御兩宮遺服皆納玩府內外
混漫男女無別丹屏之北爲酤鬻之所青蒲之上開
桑中之肆又微服潛行信次忘反端委以朝虛位交
戟而守空宮積旬矣宰輔忠賢盡誠奉主誅鋤羣小
翼能悛革曾無克己更深怨憾公卿股肱以異己寘
戮文武昭穆以德譽見猜放肆醜言將行屠膾社稷
危殆有過綴旒昔太宗克光於漢世簡文代興于晉
氏前事之不忘後人之師也鎮軍居正體道家國是
賴伊霍之舉寔寄淵謨便可詳依舊典以禮廢黜中
軍將軍新安王體自文皇睿德天秀宜入嗣鴻業永
寧四海外即以禮奉迎未亡人屬此多難投筆增慨
延興元年十月令明帝進封宣城王又矯太后
令廢帝爲海陵王而自立

司空後將軍丹陽尹右僕射中領軍八座夫明晦迭

來屯平代有上靈所以睠命億兆所以歸懷自皇家
淳耀列聖繼軌諸侯官方百神受職而殷憂時啓多
難荐臻隆昌失德特紊人鬼非徒四海解體乃亦九
鼎將移賴天縱英輔大匡社稷崩基重造隆典再興
嗣主幼冲庶政多昧且早嬰疴疾弗克負荷所以宗
正內侮戚藩外叛覘天視地人各有心雖三祖之德
在民而七廟之危行及自非樹以長君鎮以淵器未
允天人之望寧息奸宄之謀太傅宣城王胤體宣皇
鍾慈太祖識冠生民功高造物符表夙著謳頌有在
宜入承寶命式寧宗祏帝可降封海陵王吾當歸老
別館昔宣帝中興漢室簡文重延晉祀庶我鴻基於
茲永固言念家國感慶載懷

廢東昏侯令

東昏即位淫虐不道梁高祖蕭衍為雍州刺史以誅梅蟲兒茹法珍為名移檄京邑兼衛尉張稷等斬東昏首送衍太后令廢為東昏侯依漢海昏侯故事

皇室受終祖宗齊聖太祖高皇帝肇基駿命膺籙受
圖世祖武皇帝係明下武高宗明皇帝重隆景業咸
降年不永宮車係晏皇祚之重允屬儲元而稟質凶
愚發于稚齒爰自保姆迄至成童忍戾昏頑觸途必
著高宗留心正嫡立嫡惟長輔以羣才閑以賢戚內
外維持翼免多難未及暮稔便逞屠戮密戚近親元

勳良輔覆族殲門旬月相係凡所任杖盡慝窮姦皆
營伍屠販容狀險醜身秉朝權手斷國命誅戮無辜
納其財產睚眦之間屠覆比屋身居元首好是賤事
危冠短服坐臥以之晨出夜反無復已極驅斥氓庶
巷無居人老細奔遑寘身無所東邁西屏北出南驅
負疾輿屍填街塞陌興築繕造日夜不窮晨搆夕毀
朝穿暮塞絡以隋珠方斯已陋飾以璧璫曾何足道
時暑赫曦流金鑠石移竹蓺果匪日伊夜根未及植
葉已先枯畚鍤紛紜勤倦無已散費國儲專事浮飾
逼奪民財自近及遠兆庶恇恇流竄道路府帑既竭
肆奪市道工商裨販行號道泣屈此萬乘躬事角抵
昂首翹肩逞能撞木觀者如堵曾無忤容芳樂華林
並立闐闐踞肆鼓刀手銓輕重干戈鼓譟昏曉靡息
無戎而城豈足云譬至于居喪淫讌之愆三年載弄
之醜反道違常之豐牝鷄晨鳴之慝於事已細故可
得而略也罄楚越之竹未足以言校辛癸之君豈或
能匹征東將軍忠武奮發投袂萬里光奉明聖翊成
中興乘勝席捲掃清京邑而羣小靡識嬰城自固緩
戮稽誅倏彌旬月宜速剿定寧我邦家可潛遣間介
密宣此旨忠勇齊奮遄加蕩撲放斥昏凶衛送外第

未亡人不幸驟此百罹感念存沒心焉如割柰何柰

何

南康王改封宣城王相國令

永元二年冬蕭衍奉王起義稱太后

今明年即帝位是為和帝

西中郎將南康王宜纂承皇祚光臨億兆方俟清宮

未即大號可且封宣城南琅邪南東海東陽臨海新

安尋陽南郡竟陵宜都十郡為宣城王相國荊州牧

加黃鉞置僚屬選百官西中郎府南康國並如故須

軍次近路主者詳依舊典法駕奉迎

並南齊書

文惠太子長懋

字雲喬世祖長子

疾篤上世祖表

臣地屬元良業微三善光道樹風於焉蓋闕晨宵

懼有若臨淵攝生舛和構離痾疾大漸惟幾顧陰待

謝守器難永視膳長違仰戀慈顏內懷感哽竊惟死

生定分理不足悲伏願割無已之悼損既往之傷寶

衛聖躬同休七百臣雖沒九泉無所遺恨

豫章王嶷

字宣儼高帝第二子武帝同母弟歷大司馬揚州刺史中書監

手啓武帝

永明元年嶷領太子太傅手啓上上答之

陛下以叡孝纂業萬寓維新諸弟有序臣屢荷隆愛

叨授台首不敢固辭俛仰祇寵心寬如失負重量力
古今同規臣窮生如浮質操空素任居鼎右已移氣
序自頃以來宿疾稍纏心慮恍惚表于容狀視此根
候常恐命不勝恩加以星緯屢見災祥雖脩短有恒
能不耿介比心欲從俗啓解今職但措辭爲鄙或貽
物誚所以息意緘嘿一委時運而可復加寵榮增其
顛墜且儲傳之重實非恒選遂使太子見臣必束帶
宮臣皆再拜二三之宜何以當此陛下同生十餘今
惟臣而已友于之愛豈當獨臣鍾其隆遇別奉啓事
仰祈恩照臣近亦侍言太子告意子良具因王儉申
榮厚恩必誓以命請

武帝答

事中恐不得從所陳

上論州郡秩俸表

宋代以來州郡秩俸及供給
隨土所出無有定准疑上表

從之

循革貴宜損益資用治在夙均政由一典伏尋郡縣
長尉俸祿之制雖有定科而其餘資給復由風俗東

北異源西南各緒習以爲常因而弗變緩之則莫非
通規澄之則靡不入罪殊非約法明章先令後刑之
謂也臣謂宜使所在各條公用公田秩俸迎送舊典
之外守宰相承有何供調尚書精加洗覈務令優衷
事在可通隨宜開許損公侵民一皆止却明立定格
班下四方永爲恒制

又啓

宋元嘉世諸王入齋閣得白服裙帽見人主
惟出太極四廂乃備朝服自比以來此事一
斷上與嶷同生相友睦宮內曲宴許依元嘉
嶷固辭不奉敕惟車駕幸第乃白服烏紗帽
以侍宴焉啓自
陳上上答之

臣自還朝便省儀刀捉刀左右十餘亦省惟郊外遠
行或復暫有入殿亦省服身今所牽仗二俠轂二白
直共七八十人事無大小臣必欲上啓伏度聖心脫
未委曲或有言其多少不附事實仰希即賜垂敕又
啓揚州刺史舊有六白領合扇二百拂臣脫以爲疑
不審此當云何行園苑中乘輦出籬門外乘輦鳴角
皆相仍如此非止於帶神州者未審此當云何方有
行來不可失衷

武帝答

儀刀捉刀不應省也俠轂白直乃可共百四五斗以

還正是耳亦不曾聞人道此吾自不使諸王無仗况復汝耶在私園苑中乘此非疑郊外鳴角及合扇并拂先乃有不復施用此來甚久凡在鎮自異還京師先廣州乃立鼓吹交部遂有輦事隨時而改亦復有可得依舊者汝若有疑可與王儉諸人量衷但令人臣之儀無失便行也

又啓

臣拙知自處闇於疑訪常見素姓扶詔或著布屨不意爲異臣在西朝拜王儀飾悉依宋武陵王例有二鄣扇仍此下都脫不爲疑小兒奴子並青布袴衫臣

齋中亦有一人意謂外庶所服不疑與羊車相類曲荷慈旨今悉改易臣昔在邊鎮不無羽衛自歸朝以來便相分遣俠轂白直格置二百許人臣頃所引不過一百常謂京師諸王不煩牽仗若郊外遠行此所不論有仗者非臣一人所以不容方幅啓者又因王儉備宣下情臣出入榮顯禮容優泰第守華曠事乖素約雖宋之遺制恩處有在猶深非服之恐威衛之請仰希曲照

武帝又荅

傳詔臺家人耳不足涉嫌鄣扇吾識及以來未見故

有敕耳小兒奴子本非嫌也吾有所聞豈容不敕汝
知令物致議耶吾已有敕汝一人不省俠轂但牽之
吾昨不通仗事儉已道吾即令答不煩有此啓須間
言自更一二

又啓

違遠侍宴將踰一紀憂苦間之始得開顏近頻侍坐
不勝悲喜沾飲過量實欲仰示恩狎令自下知見以
杜游塵陛下留恩子弟此情何異外物政自彊生間
節聲其厚薄伏度或未上簡臣前在東田承恩過醉
實思歎往秋之謫故言啓至切亦令羣物聞之伏願

已照此心前侍幸諱宅臣依常乘車至仗後監伺不
能示臣可否便互競啓間云臣車逼突黃屋麾旄如
欲相中推此用意亦何容易仰賴慈明即賜垂敕不
爾臣終不知闈貽此累比日禁斷整密此自常理外
聲乃云起臣在華林輒提御刀因此更嚴度情推理
必不容爾爲復上啓知耳但風塵易至和會實難伏
願猶憶臣石頭所啓無生間縫比閒侍無次略附茹
亮口宣臣由來華素已具上簡每欲存衷意慮不周
或有乖常且臣五十之年爲翫幾時爲此亦復不能
以理內自制北第舊邸本自甚華臣改修正而已小

小製置已自仰簡往歲收合得少雜材并蒙賜故板
啓榮內許作小眠齋始欲成就皆補接爲辨無垂格
製要是檉柏之華一時新淨東府又有齋亦爲華屋
而臣頓有二處住止下情竊所未安訊訪東宮玄圃
乃有柏屋製甚古出內中無此齋臣乃欲壞取以奉
太子非但失之於前且補接既多不可見移亦恐外
物或爲異論不審可有垂許送東府齋理否臣公家
住止率爾可安臣之今啓實無意識亦無言者太子
亦不知臣有此屋政以東宮無而臣自處之體不宜
爾爾所啓蒙允臣便當敢成第屋安之不疑陛下若
不照體臣心便當未廢不修臣自謂今啓非但是自
處宜然實爲微臣往事伏願必垂降許伏見以諸王
舉貨屢降嚴旨少拙營生已應上簡府州郡邸舍非
臣私有今巨細所資皆是公潤臣私累不少未知將
來罷州之後或當不能不試學營覓以自贍連年惡
疾餘顧影單回無事畜聚惟逐手爲樂耳

武帝答

白澤文惠太子小字

茹亮今啓汝所懷及見別紙汝勞疾亦復那得不動
何意爲作煩長啓事凡諸普敕此意可尋當不關汝
一人也宜有敕事吾亦必道頃見汝自更委悉書不

欲多及屋事慎勿彊厝此意白澤亦當不解何意爾

又啓

永明四年唐寓之賊起嶷啓上上答之

此段小寇出於凶愚天網宏罩理不足論但聖明御世幸甚不爾比藉聲聽皆云有由而然但頃小大士庶毋以小利奉公不顧所損者大撻籍檢功巧督郵簡小塘藏丁匿口凡諸條制實長怨府此目前交利非天下大計一室之中尚不可精宇宙之內何可周視公家何嘗不知民多巧古今政以不可細碎故不爲此實非乖理但識理者百不有一陛下弟兄大臣猶不皆能伏理况復天下悠悠萬品怨積聚黨凶迷

相類止于一處何足不除脫復多所便成紛紜久欲上啓閑侍無因謹陳愚管伏願特留神思

紛紜南史作紜紜

武帝答

欺巧那可容宋氏混亂以爲是不蚊蟻何足爲憂已爲義勇所破官軍昨至今都應散滅吾政恨其不辨大耳亦何時無亡命耶

臨終啓武帝

永明十年嶷疾篤表解職不許賜錢百萬營功嶷又啓曰

臣自嬰今患亟降天臨醫走術官泉開藏府慈寵優渥備極人臣生年疾迫遽陰無幾願陛下審賢與善極壽蒼昊彊德納和爲億兆御世命違昌數奄奪恩

憐長辭明世伏涕嗚咽

與沙州刺史楊廣香書

廣香本氏王楊難當族弟先奔虜為陰平公難

當從兄子文弘宋末授武平王仇池公齊太祖即位詔廣香為沙州刺史及梁州刺史范柏年被誅其親將李烏奴奔文弘攻梁州為刺史王玄邈所破嶷時為荊州遣兵討烏奴與廣香書文弘歸降復以為北秦州刺史

夫廢興無謬逆順有恒古今共貫賢愚同察梁州刺

史范柏年懷挾詭態首鼠兩端既已被伐盤桓稽命

遂潛遣李烏奴叛楊文弘扇誘邊疆荒雜柏年今已

梟禽烏奴頻被摧破計其餘燼行自消夷今遣參軍

行晉壽太守王道寶參軍事行北巴西新巴二郡太

守任湜之行宕渠太守王安會領銳卒三千過塗風

邁浮川電掩又命輔國將軍三巴校尉明惠照巴郡

太守魯休烈南巴西太守柳弘稱益州刺史傅琰並

簡徒競驚選甲爭馳雍州水步行次魏興并山東僑

舊會于南鄭或汎舟墊江或飛旌劔道腹背颺騰表

裏震擊文弘容納叛戾專為淵藪外侮皇威內陵國

族君奕世忠款深識理順想即起義應接大軍共為

犄角討滅烏奴剋建忠勤茂立誠節沈攸之資十年

之積權百旅之衆師出境而城潰兵未戰而自屠朝

廷無遺鏃之費士民靡傷瘵之弊况蕞爾小豎方之

茂如其取殲殄豈延漏刻忝以寡昧分陝司蕃清氛
蕩穢諒惟任職此府器械山積戈旗林聳士卒剽勁
蓄銳積威除難剿寇豈俟徵習但以剪伐萌菌弗勞
洪斧撲彼蚊蚋無假多力皇上聖哲應期恩澤廣被
罪止首惡餘無所問賞罰之科具寫如別

南齊書

竟陵王子良

字雲英武帝第二子歷司徒進太傅

陳高帝言臺使

子良宋昇明中爲會稽太守宋世皆責成郡縣孝武徵求急速

始遣臺使公役勞擾及太祖踐阼子良陳之

前臺使督逋切調恒聞相望于道及臣至郡亦殊不
踈凡此輩使人既非詳慎勤順或貪險崎嶇要求此

役朝辭禁門情態即異暮宿村縣威福便行但令朱
鼓裁完鉞槩微具顧盼左右叱咤自專擿宗斷族排
輕斥重脅遏津埭恐喝傳郵破岡水逆商旅半引逼
令到下先過已船浙江風猛公私畏渡脫舫在前驅
令俱發呵蹙行民固其常理侮折守宰出變無窮既
瞻郭望境便飛下嚴符但稱行臺未顯所督先訶疆
寺却攝羣曹開亭正榆便振荆革其次絳標寸紙一
日數至徵村切里俄刻十催四鄉所召莫辨枉直孩
老士庶具令付獄或尺布之逋曲以當匹百錢餘稅
且增爲千或誑應質作尚方寄繫東冶萬姓駭迫人

不自固遂漂衣敗力競致兼漿值今夕酒諧肉飫即許附申赦格明日禮輕貸薄便復不入恩科筐貢微闕篳撻肆情風塵毀謗隨忿而發及其狃蒜轉積鷲粟漸盈遠則分鬻他境近則託貿吏民反請郡邑助民由緩回刺言臺推信在所如聞頃者令長守牧離此每實非復近歲愚謂凡諸檢課宜停遣使密畿州郡則拈賜敕遙外鎮宰明下條源既各奉別旨人競自罄雖復臺使盈湊會取正屬所徒相疑債反更淹懈凡豫衣冠荷恩盛世多以闇緩貽讐少爲欺猾入罪若類以宰牧乖政則觸事難委不容課逋上綱偏

覺非才但賒從差降各限一期如乃事速應緩自依違糾坐之坐之之科不必須重但令不行期在可速且兩裝之船充擬千緒三坊寡役呼訂萬計每一事之發彌晨方辦粗計近遠率遣一部職散人領無減二十舟船所資皆復稱是長江萬里費固倍之較略一年脫得省者息船優役寔爲不少兼折姦減竊遠近暫安

杜氏通典表云宋文帝元嘉中皆責成郡縣孝武徵求急速以郡縣遲緩始遣臺使自此

公役勞擾凡此之輩云云

上高帝墾田表

時爲丹陽尹開私倉賑屬縣貧民建元三年上表內之會遷官

事寢

京尹雖居都邑而境壤兼跨廣袤周輪幾將千里縈
原抱隰其處甚多舊遏古塘非唯一所而民貧業廢
地利久蕪近啓遣五官殷滿典籤劉僧瑗到諸縣循
履得丹陽溧陽永世等四縣解并村耆辭列堪墾之
田合計荒熟有八千五百五十四頃脩治塘遏可用
十一萬八千餘夫一春就功便可成立

上讜言表

臣聞明臺既闢承雲之歌闡衢室爰啓南風之頌流
莫非降道爚輝紆靈浸澤陛下凝慶協圖席昌屬歷
乾臨冬曖海鏡春亭選議鈞俗觀風調紀垂聽革之
典降聆金之訓用能詩史無輟工頌有聞是故置四
輔立七諫正國度箴王闕臣謂當今宜崇諫司專事
昭塞職聒謬績宣王則優其寵秩厚其節禮庶
獻鱣之美方高聖代至乃靡衣媮食曾宇雕墉商貨
浮侈田萊蕪替械樸爽流標梅失序勉民觀俗之宜
設官立事之要隨間興規袞廢能補如此則壤誅無
遠轅樂可追

上武帝論會上塘役啓

王敬則爲會稽太守會
土邊帶湖海民丁無士

庶皆保塘役敬則以工力有餘悉評歛爲錢
送臺庫以爲便宜上許之永明二年子良領
司徒上表
上不納

伏尋三吳內地國之關輔百度所資民庶彫流日有
困殆蠶農罕獲饑寒尤甚富者稍增其饒貧者轉鍾
其弊可爲痛心難以辭盡頃錢貴物賤殆欲兼倍凡
在觸類莫不如茲稼穡難劬斛值數倍今機杼勤苦
匹裁三百所以然者實亦有由年常歲調既有定期
僮卹所上咸是見直民間錢多剪鑿鮮復完者公家
所受必須員大以兩代一困於所買鞭捶質繫益致
無聊臣昔忝會稽粗閑物俗塘丁所上本不入官良
由陂湖宜壅橋路須通均夫訂直民自爲用若甲分
毀壞則年一脩改若乙限堅完則終歲無役今郡通

課此直悉以還臺租賦之外更生一調致令塘路崩
蕪湖源泄散害民損政實此爲劇建元初狡虜游覓
軍用殷廣浙東五郡丁稅一千乃有質賣妻兒以充
此限道路愁窮不可聞見所逋尚多收上事絕臣登
具啓聞即蒙蠲原而此年租課三分逋一明知徒足
擾民實自弊國愚謂塘丁一條宜還復舊在所逋卹
優量原除凡應受錢不限大小仍令在所折市布帛
若民有雜物是軍國所須者聽隨價准直不必一應
送錢于公不虧其用在私實荷其渥昔晉氏初遷江
左草創絹帛所直十倍於今賦調多少因時增減永

初中官布一匹直錢一千而民間所輸聽爲九百漸及元嘉物價轉賤私貨則束直六千官受則匹准五百所以每欲優民必爲降落今入官好布匹堪百餘其四民所送猶依舊制昔爲損上今爲刻下氓庶空儉豈不由之救民拯弊莫過減賦時和歲稔尚爾虛乏儻值水旱寧可熟念且西京熾強實基三輔東都全固寔賴三河歷代所同古今一揆石頭以外裁足自供府州方山以東深關朝廷根本夫股肱要重不可不卹宜蒙寬政少加優養略其目前小利取其長久大益無患民貲不殷國財不阜也宗臣重寄咸云利國竊如愚管未見可安

密啓武帝

時武帝新親政水旱不時
子良爲侍中兼司徒密啓

臣思水潦成患良田沃壤變爲汙澤農政告祥因高肆務播殖既周繼以旱虐黔庶呼嗟相視禿氣夫國資于民民資于食匪食匪民何以能政臣每一念此寢不便席本始中郡國大旱宣帝下詔除民租今聞所在逋餘尚多守宰嚴期兼夜課切新稅力尚無從故調于何取給政當相驅爲盜耳愚謂逋租宜皆原除少降停恩徵紓民命自宋道無章王風陵替竊官

假號駢門連室今左民所檢動以萬數漸漬之來非復始適一朝洗正理致沸騰小人之心罔思前恩董之以威反怨後罰獸窮則觸事在匪輕齊有天下日淺恩洽未布一方或飢當加優養愚謂自可依源剗除未宜便充猥役且部曹檢校誠存精密令史奸黠鮮不容情情既有私理或枉謬耳目有限羣狡無極變易是非居然可見詳而後取於事未遲明詔深矜獄圜恩文累墜今科綱嚴重稱爲峻察負罪離讐充積牢戶暑時鬱蒸加以金鐵聚憂之氣足感天和民之多怨非國福矣頃土木之務甚爲殷廣雖役未及民勤費已積炎旱致災或由於此皇明載遠書軌未一緣淮帶江數州地耳以魏方漢猶一郡之譬以今比古復爲遠矣何得不愛其民緩其政救其危存其命哉湘區奧密蠻寇熾彊如聞南師未能挫戮百姓齊民積年塗炭疽食侵淫邊虞方重交州夔絕一垂寔惟荒服恃遠後賓固亦恒事自青德啓運欵關受職置之度外不足絀言今縣軍遠伐經途萬里衆寡事殊客主勢異以逸待勞全勝難必又緣道調兵以足軍力民丁烏合事乖習銳廣州積歲無年越州兵糧素乏加以發借必致恇擾愚謂叔獻所請不宜聽

從取亂侮亡更俟後會雖緩歲月必有可禽之理差
息發動費後之勞劉楷見甲以助湘中威力既舉蟻
寇自服

又啓武帝

詔折租布二分
取錢子良又啓

臣一月入朝六登文陛廣殿稠人裁奉顏色縱有所
懷豈敢自達比天旨亟覓地孽亟臻民下妖訛好生
嗜嗜穀價雖和比室飢嗷縑纈雖賤駢門躃質臣一
念此每入心骨三吳輿區地惟河輔百度所資罕不
自出宜在蠲優使其全富而守宰相繼務在哀剋圍

桑品屋以准貲課致令斬樹發瓦以克重賦破民財
產要利一時東郡使民年無常限在所相承准令上
直每至州臺使命切求懸急應充猥役必由窮困乃
有畏失嚴期自殘軀命亦有斬絕手足以避徭役生
育弗起殆爲恒事守長不務先富民而惟言益國豈
有民貧於下而國富於上耶又泉鑄歲遠類多翦鑿
江東大錢十不一在公家所受必須輪郭完全遂買
本一千加子七百猶求請無地捶革相驅尋完者爲
用既不兼兩回復遷貿會非委積徒令小民每嬰困
苦且錢帛相半爲制永久或聞長宰須令輸直進違

舊科退容姦利八屬近縣既在京畿發借徵調寔煩他邑民特尤貧連年失稔草衣藿食稍有流亡今農政就興宜蒙賑給若逋課未上許以申原免豫二藩雖曰舊鎮往屬兵虞累棄鄉土密邇寇庭下無安志編草結菴不違涼暑扶淮聚洛靡有生向俱稟人靈獨絕温飽而賦歛多少向均天實謂凡在荒民應加蠲減又司市之要自昔所難頃來此役不由才舉並條其重貲許以賈術前人增估求狹後人加稅請代如此輪回終何紀極兼復交關津要共相脣齒愚野未閑必加陵誑罪無大小橫沒貲載凡求試穀帛類

非廉謹未解在事所以開容夫獄訟惟平畫一在制雖恩家得罪必宜申憲鼎姓貽譽最合從網若罰典惟加賤下辟書必蠲世族懼非先王立理之本尚書列曹上應乾象如聞命議所出先諮于都都既下意然後付郎謹寫關行愚謂郎官尤宜推擇宋運告終戎車屢駕寄名軍牒動竊數等故非分充朝資奉殷積廣越邦宰梁益郡邑叅差調補寔允事機且此徒宄雜罕遵王憲嚴加廉視隨違彈斥一二年間可減

大半

並南齊書

諫射雉啓

世祖好射雉
子良啓諫

鑿輦亟動天蹕屢巡陵犯風煙驅馳野澤萬乘至重
一羽甚微從甚微之權忽至重之誠頃郊郛以外科
禁嚴重匪直芻牧事罷遂乃寃掩殆廢且田月向登
桑時告至士女呼嗟易生尊議棄民從欲理未可安
曩時巡幸必盡威防領軍景先詹事赤斧堅甲利兵
左右屯衛令馳驚外野交侍疎闊晨出晚還頓遺清
道此實愚臣最所震迫狡虜玩威甫獲款關二漢全
富猶加曲待如聞使臣頻亦怨望前會東宮遂形言
色昔宋氏遣使舊列階下劉績銜使始登朝殿今既

反命宜賜優禮伏謂中堂雲構實惟峻絕檐陛深嚴
事隔涼暑而別爲一室如或有疑邊帶廣途訛言孔
熾毀立之易過於轉圜若依舊制通敞實允觀聽頃
市司驅扇租估過刻吹毛求瑕廉察相繼被以小罪
責以重備愚謂宜敕有司更詳優格臣年方朝賢齒
未相及以管窺天猶知失得廊廟之士豈闇是非未
聞一人開一說爲陛下憂國家非但面從亦畏威耳
臣若不啓陛下於何聞之

諫射雉又一
啓在釋部

上武帝請贈豫章王嶷啓

啓上詔贈嶷假黃鉞都督中外諸軍事
丞相揚州牧綠綬綬具九服錫命之禮

臣聞春秋所以稱王母弟者以尊其所重故也是以禮秩殊品爵命崇典在漢則梁王備出警入蹕之儀在晉則齊王具殊服九命之贈江左以來尊親是闕故致袞章之典廢而不傳寔由人缺其位非禮虧省齊王故事與今不殊締構王業功迹不異凡有變革隨時之宜者政緣恩情有輕重德義有厚薄若事籌前規禮無異則且梁齊闕令終之美猶饗褒贈之榮况故大司馬仁和著於天性孝悌終於立身節義表於勤王寬猛彰於御物奉上無艱劬之貌接下無毀傷之容淡矣止於清貞無喜愠之色悠然栖於靜默絕馳騁之聲詩云靡不有初鮮克有終夫終之者理實爲難在於令行無廢斯德東平樂于小善河間悅於詩書勲績無聞難危不涉尚致卓爾不羣英聲萬代况今協贊皇基經綸霸始功業高顯清譽逾彰富貴隆重廉潔彌峻等古形今孰類茲美臣愚忖度未有斯例凡庶族同氣愛睦尚少豈有仰覩陛下垂友于之性若此者乎共起布衣俱登天貴生平游處何事不同分甘均味何珍不等未嘗覩貌而天心不懼見形而聖儀不悅爰及臨危捨命親瞻喘息萬分之際沒在聖目號哭動乎天地感慟驚乎鬼神乃至撤

膳移寢坐泣遷旦神儀損耗隔宿改容奉瞻聖顏誰
不悲悚歷古所未聞記籍所不載既有若斯之大德
而典服之贈不彰如其脫致虧忘追改爲煩不令千
載之下物有遺恨其德不具美者尚荷嘉隆之命况
事光先烈者寧可缺茲盛典臣恐有識之人容致其
議且庶族近代桓溫庾亮之類亦降殊命伏度天心
已當有在

啓論玉輅

永明初加玉輅爲重蓋又作麒麟頭采畫以馬首戴之子良啓

臣聞車旗有章載自前史噐必依禮服無舛法凡蓋
員象天軫方法地上無二天之儀下設兩蓋之飾求

之志錄恐爲垂衷又假爲麟首加乎馬頭事不師古
鮮或可施

與安陸侯緬書

緬封安陸侯爲五兵尚書出爲吳郡太守大
著風績子良與書世祖嘉其能轉郢州刺史

竊承下風數十年來未有此政

並南齊書○南史
姑蘇未有此政

與荊州隱士劉虬書

虬爲南郡丞自免布衣草屨茅室土帳禮誦
長齋研精佛理子良深信正法與虬書要其
東下王元長之詞也又與南郡太守劉景綦
書令加資遣復使虬鄉人吏部郎庾杲之致
書喻旨虬內固已決非復外物所動
建武二年冬疾移江州卒謚曰文範

玉燭登年金商在律炎涼始貿動靜惟安勤味道腴

幸遵雅尚豈不樂哉僕誠幸甚百姓一心衆生不疾
比屋可封將又何求但良書獨擁善談無析願言之
子實痲我心所以不遠千里尺書道意自淳清既辨
澆漓代襲隱顯之術參差語默之途紛互或飾智以
警愚或激情以悟俗或穢已以閤通或謬歌以明道
屠羊駟馬未足磷其堅佯狂如愚豈能緇其白官楚
蕃魏人外之氣逾邈入漢游梁區中之韻彌少及推
其輕重品其得失則淵懷洞賞寧或符之僕夙養閒
襟長慕出槩迹塵珪組心逸江湖末面自親聞風如
舊而迴駕之念徒軫式閭之禮無階固已佇軸深哀

傾筐遐路者矣君矯然獨遠確乎難拔素志與白雲
同悠高情與青松共爽宣習質文緇林枯而重菴昭
辨空有連河壅而復滔所謂忘言之人可論天人之
際豈能鳳舉鶴翻有心儀萃高踰愛海比策禪衢沾
濠射之冥游屈祗鷺之法侶聞三乘於窮子發二諦
於困蒙有是因也何其暢歟今皇風具穆至道弘被
四海不溢五嶽無塵膠序肇修經法敷廣人賤璣璜
家習禮讓樵蘇必時郊林全鬱罽網有節鱗羽偕翔
至于層山絕澗還帶畿畎膏田沃野亘望廡躔信可
以招往隱論栖集勝寄故文舉築室治城之阿次宗

植援西山之趾葛洪考槃于海岫釋遠肥遁于鍾幽
每踐其遺蹤輒深九原之歎若高步可遷復何懷乎
四子昔宣尼之見伯雪師利之往維摩豈不知相忘
之道哉諒有以也未敘之間爲道自愛一二令凌琚
之口具廣弘明集○此本王融代作宜以屬融而下
與南郡書又不言何人作故但統附竟陵
劉蚪答竟陵王書蚪字靈預南陽涅陽人
累徵不就○蚪與虬同
蚪四節卧病三時營灌暢餘陰于山澤託暮情於魚
鳥寧非唐虞重恩周召宏施蚪進不研幾入玄無洙
泗稷館之辨退不凝心出累非豕間樹下之節遠澤
既灑仁規先著謹收樵牧之嫌敬加式畫之義南齊書

與南郡太守劉景蕤書

去冬因君與劉居士書今春得其返价辭趣翩翩足
有才藻實子雲之筆札元瑜之書記伸復咨嗟彌用
欽想此子含貞抱璞比調雲霞背俗居幽寓歡林澍
養志南荆可與卞寶爭價韜光梵服固同隋照共明
雖顏段之栖遲偃仰揚鄭之寂漠恬惓取之若人信
可同日而語矣且道性天悠禪心自謚敦悅九部研
味三乘在家菩薩行之而不艱白衣居士即之而方
易逝將燭昏霾於慧炬拯淪溺於法橋扇靈嶠之留
風鏡貞林之絕影僕栖尚既同情契彌至而悠悠京

苑間以江山假復神通遠邇冥交曉曙疇得寫析深
襟辨明幽旨迹生滅之中談究真俗之諦義故重有
別書招來畿邑居問道之次具為敦請此蘭山桂水
既足逍遙儒侶玄宗復多朋往非以一爵相加豈其
旌蒲為分直闇投誠素庶必能玄了脫悠爾來儀想
時加資遣也

廣弘明集

答張融

竟陵張欣為諸賢令罪當死欣父與世
宋世討南譙王義宣官軍欲殺融父暢
與世以袍覆暢而坐得免與世卒融着高履
負土成墳至是融啓竟陵王子良乞代欣時
死子良

答曰

此乃是長史美事恐朝有常典不得如長史所懷

齊書

答顧憲之

憲之字士思吳郡吳人
歷豫章太守太中大夫

憲之為南中郎長史行婺州事時司徒竟陵
王於宣城臨成定陵三縣界立屯封山澤數
百里禁民樵採憲之固陳不可
言甚切直王荅之即令無禁

非君無以聞此德音

梁書

眼銘

惟正是視玄黃匪惑非禮不觀儀形是則慎爾所覲
無愆斯德

耳銘

惟耳是聽仁愛是聞詳察巧言離辨異羣無迷邪諂
炫惑莫分

口銘

惟口是慎慎乎語笑三緘是戒事重周廟戒之戒之

無貽厥誚

並藝文類聚

行宅詩序

余稟性端踈屬愛閑外往歲羈役浙東備歷江山之美名都勝境極盡登臨山原石道步步新情迴池絕澗往往舊識以吟以詠聊用述心

登山望雷居士精舍同沈右街過劉先生墓下

詩序

沛國劉子珪學優未仕跡邇心遐履信體仁古之遺

德潛舟迅景滅賞淪輝言念芳猷式懷嗟述屬舍弟隨郡有示來篇彌績久要之情益深宿草之歎升望西山率爾爲答雖因事雷生實申悲劉子云爾

實僚七要

松既煙而接漢竹緣嶺而負筠哀過鴻於月曉悲夜後於霜旻乃鶴駕之非遠信羽車之可鄰鴻池廣象太液染華勢含五水氣疏九河既百尋而照底亦千丈而分沙故乘流以神王或鼓地而目多豈能從我汎此安波

巴東王子響

字雲音武帝第四子

啓武帝

子響為荊州刺史好武事自選帶仗左右六十人又私作錦袍絳襖欲以餉蠻交易器仗長史劉寅等密啓子響執寅等殺之上怒遣衛尉胡諧之中書舍人茹法亮等請江陵子響白服登城遣使相聞不容因進戰軍敗赴建康臨死啓上削屬籍易姓蝟氏

劉寅等入齋檢仗具如前啓臣罪既山海分甘斧鉞奉敕遣胡諧之茹法亮賜重勞某等至竟無宣旨便建旗入津對城南岸築城守臣累遣書信喚法亮渡乞白服相見某永不肯群小懼怖遂致攻戰此臣之罪也臣此月二十五日束身投軍希還天闕停宅一月臣自取盡可使齊代無殺子之譏臣免逆父之詩

既不遂心今便命盡臨啓哽塞知復何陳

同前 子響兵敗縊死密作啓數紙藏妃王氏裙帶中具自申明

輕舫還闕不得此苦之深惟願矜憐無使竹帛齊有反父之子父有害子之名

有司奏魚復侯子響還本 豫章王嶷初養子響為子後有子表留為

嫡永明六年有司奏請還本乃封巴東郡王○附

子響體自聖明出繼宗國大司馬臣嶷昔未有胤所以因心鞠養陛下弘天倫之愛臣嶷深猶子之恩遂乃繼體扶疏世祚垂改茅蔭蔚冢嗣莫移誠欣悖睦之風實虧立嫡之教臣等參議子響宜還本

隨郡王子隆

字雲興武帝第八子歷荊州刺史侍中中軍大將軍為明帝所害

山居序

西園多士平臺盛賓鄒馬之客咸在伐木之歌屢陳
是用追芳昔娛神遊千古故亦一時之盛事

始安王遙光

字元暉高帝次兄道生子嗣父爵歷侍中中書令東昏時謀逆敗誅

啓誅謝朓

朓以告王敬則反遷尚書吏部郎及東昏失德江祏等欲立遙光遙光亦遣人密致意朓自以受恩高宗不荅乃稱救召朓付廷尉與徐孝嗣祏暄等連名啓誅朓

謝朓資性險薄大彰遠近王敬則往搆凶逆微有誠
効自爾昇擢超越倫伍而谿壑無厭著於觸事比遂
扇動內外處處姦說妄貶乘輿竊論宮禁間謗親賢
輕議朝宰醜言異計非可具聞無君之心既著共棄
之誅宜及臣等參議宜下北里肅正刑書

東昏侯詔

公等啓事如此朓資性傾險久彰物議直以彫蟲薄
伎見齒衣冠昔在渚宮搆扇蕃邸日夜從吏仰窺俯
畫及還京師翻自宣露江漢無波以為已功素論於
茲而盡縉紳所以側目去夏之事頗有微誠賞擢曲
加逾邁倫序感悅未聞陵競彌著遂復矯構風塵妄
惑朱紫詆貶朝政疑問親賢巧言利口見醜前志涓
流纖孽作戒遠圖宜有少正之刑以申去害之義便

可收付廷尉肅明國典

尚書符討始安王遙光

遙光為太祖次兄道生子襲父封東昏侯即位

以待中中書令輔政潛與江祏兄弟謀自樹立及祏被誅遙光不自安遂舉兵攻臺衆散為臺軍所殺

逆順之數皎然有徵干紀亂常刑茲罔赦蕭遙光宗

室蚩庸才行鄙薄緹羣可望天路何階受遇自昔恩

加猶子禮絕帝體寵越皇季旗章車服窮千乘之尊

闔隍爽塏踰百雉之制及聖后在天親受顧託語言

在耳德音猶存侮蔑天明罔畏不義無君之心履霜

有日遂乃稱兵內犯竊發京畿自古巨壘莫斯為甚

今使分命六師弘宣九伐皇上當親御戎軒弘此廟

略信賞必罰有如大江

安陸侯緬

字景業齊宗室封安陸侯歷雍州刺史贈王

與王儉書

庾杲之字景行新野人累遷尚書左丞王儉謂人曰昔袁公作衛軍欲用我為長史雖不獲就要是意向如此今亦應須如我輩人也乃用杲之為衛將軍長史緬與儉書時人以入儉府為蓮花池故緬書美之○世說云王僕射高自標位常自比李膺時人呼儉府為

入芙蓉池

盛府元僚實難其選庾景行汎綠水依芙蓉何其麗

也南史

蕭景先

太祖從子歷征虜將軍丹陽尹

遺言

景先假節司州遇疾遺言

此度疾病異於前後自省必無起理但夙荷深恩今
謬充戎寄闇弱每事不稱上慙慈旨使長違聖世悲
哽不知所言可為作啓事上謝至尊粗申愚心毅雖
成長素闕訓範貞等幼稚未有所識方以仰累聖明
非殘息所能陳謝自丁荼毒以來妓妾已多分張所
餘醜猥數人皆不似事可以明月佛女桂支佛兒王
女美玉上臺美滿豔華奉東宮私馬有二十餘匹牛
數頭可簡好者十匹牛二頭上臺馬五匹牛一頭奉

東宮大司馬司徒各奉二匹驃騎鎮軍各奉一匹應
私仗器亦悉輸臺六親多未得料理可隨宜漫郵微
申素意所賜宅曠大恐非毅等所居須喪服竟可輸
還臺劉家前宅久聞其貨可合率市之直若短少啓
官乞足三處田勤作自足供衣食力少更隨宜買麤
猥奴婢充使不須餘營生周旋部曲還都理應分張
其久舊勞勤者應料理隨宜啓聞乞恩

蕭穎胄

字雲長太祖從祖弟赤斧平歷侍中尚書令

移檄京邑

和帝初為南郡王以穎胄為南郡太守時梁高祖蕭衍為雍州刺史東昏

即位殺戮大臣諸鎮懷異遣兵將襲荆雍衍與穎胄合謀起義師穎胄移檄京邑立南郡

王於江陵
是爲和帝

西中郎府長史都督行留諸軍事右軍將軍南郡太守南豐縣開國侯蕭穎胄司馬征虜將軍新興太守夏侯詳告京邑百官諸州郡牧守夫運不啻夷有時而陂數無恒剝否極則亨昔商邑中微彭韋投袂漢室方昏虐牟効節故風聲永樹卜世長久者也昔我太祖高皇帝德範生民功格天地仰緯彤雲俯臨紫極世祖嗣興增光前業雲雨之所沾被日月之所出入莫不舉踵來王交臂納貢鬱林昏迷顛覆厥序俾我大齊之祚翦焉將墜高宗明皇帝建道德之盛軌

垂仁義之至蹤紹二祖之洪基繼三五之絕業昧且不顯不明求衣故奇士盈朝異人輻輳若乃經禮緯樂之文定鼎作洛之制非雲如醴之祥白質黑章之瑞諒以則天比大無德稱焉而嗣主不綱窮肆陵暴十讐畢行三風咸襲喪初而無哀貌在感而有喜容酣酒嗜音罔懲其侮讒賊狂邪是與比周遂令親賢嬰荼毒之誅宰輔受菹醢之戮江僕射蕭劉領軍徐司空沈僕射曹右衛或外戚懿親或皇室令德或時宗民望或國之虎臣並勲彰中興功比周劭秉鈞贊契受遺先朝咸以名重見疑正直貽斃害加黨族虐

及嬰孺曾無涓陽追遠之情不顧本枝殲落之痛倍
必見疑忠而獲罪百姓業業罔知攸暨崔慧景內逼
淫刑外不堪命驅土崩之民爲免死之計倒戈迴刃
還指宮闕城無完守人有異圖賴蕭令君勳濟宗祐
業拯蒼氓四海蒙一匡之德億兆憑再造之功江夏
王拘迫威強牽制巨力迹屈當時迺心可亮竟不能
內恕探情顯加鴆毒蕭令自以親惟族長任實宗臣
至誠苦言朝夕獻入讒醜交構漸見疎疑浸潤成災
奄離怨酷用人之功以寧社稷刈人之身以騁淫濫
台輔既誅姦小競用梅蟲兒茹法珍妖忍愚戾窮縱
醜惡販鬻主威以爲家勢營惑世主恣其妖虐宮女
千餘裸服宣姪孽臣數十袒裼相逐悵飲闌肆之間
宵遊街陌之上提挈羣豎以爲歡笑劉山陽潛受凶
旨規肆狂逆天誘其衷即就梟翦夫天生蒸民樹之
以君使司牧之勿使失性豈有尊臨寓縣毒遍黔首
絕親戚之恩無君臣之義功重者先誅勲高者速斃
九族內離四夷外叛封境日蹙戎馬交馳帑藏旣空
百姓已竭不卹不憂慢遊是好民怨于下天懲于上
故熒惑襲月孽火燒官妖水表災震蝕告沴七廟阡
危三才莫紀大懼我四海之命永淪于地南康殿下

體自高宗天挺英懿食葉之徵著于弱年當璧之祥
兆乎綺歲億兆顒顒咸思戴奉且勢居上游任摠戎
略家國之否寧濟是當莫府身備皇宗忝荷顧託憂
深責重誓清時難今命冠軍將軍西中郎諮議領軍
直兵參軍軍主楊公則寧朔將軍領中兵參軍軍主
王法度冠軍將軍諮議參軍軍主龐翹輔國將軍諮
議參軍領別駕軍主宗夬輔國將軍諮議參軍軍主
樂藹等領勁卒三萬陵波電邁逕造秣陵冠軍將軍
領諮議中直兵參軍軍主蔡道恭輔國將軍中直兵
參軍右軍府司馬軍主席闡文輔國將軍中直兵參

軍軍主任漾之寧朔將軍中直兵參軍軍主韓孝仁
寧朔將軍中直兵參軍軍主朱斌中直兵參軍軍主
宗冰之建威將軍中直兵參軍軍主朱景舒寧朔將
軍中直兵參軍軍主庾域寧遠將軍軍主庾略等被
甲二萬直指建業輔國將軍武寧太守軍主鄧元起
輔國將軍前軍將軍軍主王世興等鐵騎一萬分趨
白下征虜將軍領司馬新興太守夏侯詳寧朔將軍
諮議參軍軍主柳忱寧朔將軍領中兵參軍軍主劉
孝慶建威將軍軍主江陵令江詮等帥組甲五萬駱
驛繼發雄劔高麾則五星從流長戟遠指則雲虹變

色天地爲之喬皇山川以之崩沸莫府親貫甲冑授
律中權董帥熊羆之士十有五萬征鼓紛沓雷動荆
南寧朔將軍南康王友蕭穎達領虎旅三萬抗威後
拒蕭雍州勲業盖世謀猷淵肅既痛家禍兼憤國難
泣血枕戈誓雪怨酷精卒十萬已出漢川張郢州節
義慷慨悉力齊奮江州邵陵王湘州張行事王司州
皆遠近懸契不謀而同竝勒驍猛指景風驅舟艦魚
麗萬里蓋水車騎雲屯平原霧塞以同心之士伐倒
戈之衆盛德之師救危亡之國何征而不服何誅而
不克哉今兵之所指唯在梅蟲兒茹法珍二人而已
諸君德載累世勲著先朝屬无妄之時居中否之運
受迫群豎念有危懼大軍近次當各思舊迹來赴軍
門檄到之日有能斬送蟲兒法珍首者封二千戶開
國縣侯若迷惑凶黨敢拒命者刑茲無赦戮及宗族
賞罰之信有如皦日江水在此余不食言

上和帝遺表

中興元年穎胄輔帝出
居上流憂慮感氣卒

臣疹患數日不謂便至困篤氣息綿微待盡而已臣
雖庸薄忝籍葭莩過受先朝殊常之眷循寵礪心誓
生以死屬皇業中否天地分崩摠率諸侯翼奉明聖
賴社稷靈長大明在運故兵之所臨無思不服今四

海垂乎干戈行戢方希陪翠華奉法駕反東都觀舊
物不幸遘疾奄辭明世懷此深惟永結泉壤竊惟王
業至重萬機甚大登之甚難守之未易陛下富于春
秋當遠尋祖宗創業艱難殷鑒季末顛覆厥緒思所
以念始圖終康此兆庶征東大將軍臣諱元勳上德
光贊天下陛下垂拱仰成則風流日化臣雖萬沒無
所遺恨

